

東
華
續
錄

光緒七十五

臣朱壽朋敬編

臣章圭璋恭校

三月甲午朔諭朕奉 慈禧端佑康頤昭豫莊誠皇太后祇謁 東陵前經諭令總管內務府大臣嚴飭各總管太監約束隨從太監人等不准稍有騷擾昨據儲秀宮首領太監趙福來奏稱有執事太監梁經榮邢有瑞在燕郊途次有勒索草料毆打差役之事當經欽奉 懿旨重加板責發往打牲烏拉以示懲儆我朝約束內侍執法最嚴偶有滋事無不從重懲辦此次首領太監據實陳奏立即嚴懲各隨從太監自應知儆知懼仍著總管內務府大臣及各總管太監沿途實力嚴查倘再有藉差滋擾情事即著立時奏聞定行嚴辦不得徇隱干咎○諭悼親王之嫡福晉薨逝著派總管內務府大臣耀年前往照料一切喪儀著照親王福晉之例官為辦理○乙未諭額勒和布閫敬銘張之萬許庚身孫毓汶均著賞穿黃馬褂○諭恩承等奏悼親王嫡福晉薨逝應否賞假及各處印鑰應否派署各摺片悼親王派令留京辦事責任綦重著自三月十七日起照例賞假現仍照常入值每日申刻散值毋庸在內值宿所有印鑰仍著悼親王暫行佩帶○丁酉賞給降福寺達喇嘛羅卓依小卷緞一疋德本齊格斯貴教習喇嘛等每名一

兩重銀錄二簡班第每名一兩重銀錄一簡○己亥祭 先農壇遣魁斌恭代行禮○予江蘇江都縣節

婦趙劉氏旌表○庚子 奉 慈禧端佑康頤昭豫莊誠皇太后由 東陵還宮○壬寅諭御史托佛

猷等奏內籙監計入閏時刻據實奏聞等語給事中桂年派充內籙監試於甲刻始行入閏殊屬遲延桂

年著交部議處○諭山東黃河頻年爲患小民顛沛流離迄未復業上年何王莊決口被水村莊居民困

苦每一念及矜恤時深雖經迭次加恩發帑賑濟惟災區較廣且值此青黃不接之時小民無計謀生尤

深慮慮允宜再籌賑撫以惠民生著加恩截留本年新漕粟米六萬石並新漕輕燭等項銀兩俾作賑需

陳士杰務督飭各該地方官及委員核實散放毋任吏胥稍有侵蝕用副朝廷軫念災黎至意○乙巳

杜岐爾奏查上年四部落盟長等來局會盟商籌會報災案聲明差戶遠近遵飭各旗繪圖積欠商債亦

飭清查均俟報到再請核辦其餘會辦各節當經奴才遵照理藩院奏議咨商各處會同庫倫科布多大

臣等商籌分別擬結具奏奉 旨著照所請該衙門知道欽此欽遵分飭遵辦在案現據四部落盟長等

繪圖造冊陸續報到呈請核辦前來伏查差戶遠近一節原報內稱今昔情形迥異差漸增倍力所難支

遠近代當差費增重擬請估價等語奴才當以創議分當各差原屬四盟王公會商辦理差費之說係各

旗通融辦法例所未載遠近貧富奴才無從周知是以擬飭各旗土公繪具詳晰圖說會商妥籌各抒意

見等因其奏經理藩院議覆該將軍等既令各王公繪具詳晰圖說再行核辦自應准如所擬辦理奴才
擬令各王公繪圖妥籌各抒意見原以爲重者何以輕之遠者何以近之由各旗王公會商妥籌各抒意
見繪具詳晰圖說俾無難秉公核辦也今據各盟長等僅就原定卡各差遠近輕重段落繪圖聲請核
辦並未詳晰聲明是此案各該王公既未另有意見應即擬結未便再事延宕四盟王公創議分當各
差辦法必屬盡善故能有餘年從無異議所稱差費漸增聲請估價始自同治十年春緣同治九年烏
城陷後回匪出沒大兵雲集嘉峪關驛路梗塞西疆各城軍火餉運皆走北路臺站無晷無夜供應不
加以兩雲未得應時蒙民生計維艱差繁累重情同難堪會報前情不爲無因然以目下論之烏城防軍
撤盡西疆雜差一律停走騰出科布多守卡官兵五百餘員名撤出恰克圖等卡差戶二百數十戶裁汰
裁盡減撤駐班是四盟今日之差又減於昔日本年五月以後自秋徂冬雨雪調勻如此若仍執原報研
究未免失於膠固則例內載盟長辦理盟事務均勻差戶是其專責擬請將差費估價一節飭由各該
盟長等督飭各王公查照向章自行商籌辦理以免另生枝節其積欠商債一節伏查原報內稱災重差
繁由駐班扎薩克臺站屯田烏里雅蘇臺等處商民賒取物價高低欺隱月利隨加還則數倍聲敘乾隆
嘉慶年間減還成案請照成案辦理等語奴才當以邊外民蒙交易向有定章若如所稱亦屬非是案情

若果符合應卽照案辦理是否可行奏請由理藩院核議經理藩院議覆雖據查明減還各案惟刻下商民是否能行依允並未覈據一面之詞未敢遽行擬定聲令查照前次奏案核辦等因自應查照奏案東公核辦必須情詞吻合方足以昭公允此件係民蒙交涉當卽照例飭山軍營兵部理藩院會同查明烏城向有四盟通事鋪戶大盛魁天義德兩處應四盟各取具甘結彙請查核前來奴才詳核結構物價皆係各盟長等相商議定公同立約近有數旗自行商定亦係兩出情願歷來相交百數十年不敢私行增長亦無一倍數倍之理月利係因定限收帳約內議定限內還者毫不加利若有限滿不能還者自限滿之日起隨月加利但一有拖欠加利者一年停利十年不能收清因有定約實非情願昔年減還所減何值近來有聞且近年時勢更非昔比天災流行蒙古生計淺薄每年應收之數只求三分之一舊欠雖計續取難停是蒙民既苦商民苦累更甚公同加結不敢擅飾等語查商民結構交易各情固難謂之欺隱時勢迥異又難使之強同是此項商債各盟長等既與之相商議定公同立約於始擬請仍飭由各盟長等自行相商辦理俾得和輯於終所有奴才查核擬結之處如蒙 俞允遵將四盟報到圖冊等件發還各該盟長等遵照辦理以免積案久懸得 旨如所請行○丁未戶部奏北洋通商大臣大學士李鴻章等奏遵議招商局事宜以保中國權利一摺光緒十二年正月二十四日軍機大臣奉 旨戶部

知道欽此由軍機處鈔交到部據原奏內稱欽奉光緒十一年九月十二日 寄諭順天府代遞道員來
廷等條陳扶持商局一條等因欽此竊維輪船招商局之設原因各口通商以來中國江海之利益為外
國商輪侵佔故設法招集華股特創此局以與洋商爭衡惟船棧碼頭成本甚重分攤客貨所得水腳無
多洋商屢次跌價擠上年又遭法兵之擾海船難行遂致局本屢折不得不暫借洋債以應急需當此
局勢岌岌之際必須官為維持乃可日就起色業經各節奏陳各節茲運鄂輪展緩運漕期限兩條不無窒
礙應毋庸議其運漕局船回空照沙甯船免稅一條查運漕沙甯船回空凡在北洋三口裝載豆貨雜糧
等項向准全免出口稅嗣後商局輪船運漕回空請免北洋三口出口稅二成如原來裝米一千石回空
時免出口貨稅二百石較沙甯船少免八成以示區別又湖北船合茶一條向由鄂豫內地運赴張家口
蒙古地方粗枝大葉價值甚輕嗣後華商由鄂附搭商局輪船出口請照磚茶之例每百斤減為出口稅
銀六錢並免復出口半稅其由津北運張家口外仍照常沿途內地稅釐以上兩條應請自本年開辦起
另將執照保單及稽核章程核定分飭遵照惟總計所沾利益每年不過核銀二萬兩左右局累既深實
不足以資補救查該局奏定章程原藉運漕水腳以補撙節客貨之不足每石實銀五錢六分零上年美
商英商承運漕糧減為三錢五分實則支用不敷現在沙甯船運漕每石應支銀四錢三分一釐零所有

本屆商局輪船運漕應請照沙甯船現領之欸支給不再區分扣減亦不扣海運局公費以資津貼又該局原存官本及光緒二年買併旗昌船棧案內奏撥官本未還銀一百七十八萬餘兩山運漕水腳項下分年扣還並湖北軍需扣欸尙應還銀七十七萬餘兩應請暫緩拔還免扣水腳各項以示體恤俟商局洋債歸結後即責令籌繳官本不准短少該局商困藉可少紓至該局自去秋向旗昌收回後遊派道員戚宣懷等認真整頓經理嚴定章程力除弊竇等語臣等伏查輪船招商局之設創始於同治十一年當時如何招商集股有無借撥官欸部中無案可稽光緒二年前兩江總督沈葆楨奏美國旗昌公司歸併招商局請撥浙江等省官欸通力合作是爲招商局報部之初案此後行之十年官本之盈虧商情之衰旺該局從未報部部中均無從查悉惟據沈葆楨原議奏稱不可失者時也有可憑者理也論時則人謀務盡適赴借貸定主之機論理則天道好還是真轉弱爲強之始等語是招商局一舉實通商以來之要務今據李鴻章等奏稱當此局勢岌岌之際必須官爲維持乃可日就起色自係實在情形查原奏回空免稅一條臣部查歷屆海運章程內開沙船領運官糧至津交清後回南販運北地貨物並准循照奏案全行免稅如往天津牛莊奉天山東各口販運仍由津局查明承運米石全清後方准填給免稅印照持赴各關呈驗放行倘有交米不清之船一概不准給照如在各口帶有洋藥應令查照新章完稅等因今

督請嗣後商局輪船運漕回空請免北洋三口出口稅二成原來裝米一千石回空時免收出口貨稅二百石係援照沙甯船成案辦理仍照沙甯船少免八成應議准行該船如帶有洋藥仍應照章納稅字樣以防包私偷漏又原奏湖北卹合茶一條臣部查俄國條約內載磚茶每百斤收正稅銀六錢半稅銀三錢等因今該督請嗣後如華商附搭商局輪船運卹合茶出口請照磚茶之例每百斤減爲出口正稅六錢並免復進口半稅係爲商船多付水腳起見且稱減稅甚微亦應准行惟卹合茶一項原運張家口各處每百斤收正稅若干半稅若干部中無案可稽應由該大臣轉飭查明報部又原奏漕運水腳一條臣部查本年二月間兩江總督曾國荃等奏蘇省海運章程內開上屆加給沙輪各船修脩每石銀一錢五分上年經戶部奏准沙船減去一錢每石准撥給五分輪船永遠停給今屆自應遵辦又沙船每石應支正項水腳四錢之內扣發三分輪船招商局業已收回仍歸華商經理似與洋商有間是否循照向來華輪之數支給抑照上年暫雇洋輪數目核給請飭部核復遵辦等因經臣部議覆本屆招商局承運江浙漕糧除每石修脩一錢五分照案永遠停給其應領水腳神福等項准其循照向來招商局華輪之數支給以示體恤其應扣回一分及三分等銀照章提扣行知直隸兩江總督查照在案查向來華輪之數較之上屆屆運外國輪船水腳每石多支銀三分零已足以示體恤應令仍照臣部前議辦理湖北湖

南採辦清米如由該局承運亦即援照江浙現支之數支給以昭畫一俟該局官本清還運腳應否議減
再由臣部酌核辦理又原奏官本暫緩拔還一條臣部查光緒二年兩江總督沈葆楨奏歸併旗昌輪船
請撥官本銀一百萬兩內江藩司十萬兩江安糧道二十萬兩江海關道二十萬兩浙江省二十萬兩江
西省二十萬兩湖北省十萬兩光緒三年直隸總督李鴻章奏撥濟招商局生息銀十萬兩內天津道五
萬兩天津海關五萬兩此招商局官款報部有案者也光緒六年三月李鴻章奏各省撥存該局官款自光
緒六年起勻作五年拔還由承運清糧水腳按年抵扣六年六月又據李鴻章奏定購美國鐵甲船二隻
提用招商局清腳還款一百萬兩此招商局拔還官款之報部有案者也復查二年沈葆楨摺內有本年
北洋又酌撥官帑以濟之語六年三月李鴻章摺內有存官本原存銀一百九十萬八千兩除撥還東海
關十二萬六千五百兩尚存一百七十八萬一千五百兩之語是招商局官本不止部中有案之一百一
十萬兩拔還官本亦不止部中有案之一百萬兩又查光緒三年南北洋大臣李鴻章等會奏整頓招商
局摺內稱歷年撥存該局官帑一百九十萬八千兩均有緩息三年俟光緒六年起緩息拔本均分五期
每年繳還一期無論如何為難不得再求展緩統計八年官本全清其緩收息款以後或作官股或陸續
帶繳屆期察看情形再議等因今據該督奏稱該局官本計歷年扣還並湖北軍需扣款業已過半外尚

應還銀七十七萬餘兩等語前後奏案頗有參差且歷年所緩應銀作何結算亦未鑒敘臣部職司度支既爲官帑有關卽無論正款外款均應詳細稽核以慎出入相應請 旨飭下北洋大臣李鴻章南洋大臣曾國荃將招商局撥借官款某年由某省某項動撥銀若干某年於某案內撥還抵還某省銀若干現在未還係欠某省銀若干併查明前後八年所緩應銀共計若干曾否陸續繳還抑係作爲官股生息應由某年起息每年息銀若干詳細開單奏報以備考核至所請應還官本七十七萬餘兩俟洋債歸結後分年籌繳未免漫無限制所有招商局未還官本除本年免與拔還應自光緒十三年起分作五年清繳每年只責令繳還十餘萬兩商力亦不至竭蹶所繳銀兩卽令提解部庫以備餉需抑臣等更有請者三代之治法貴本而抑末重農而賤商從古商務未嘗議於朝廷海上互市以來論者乃競言商政竊謂商者逐什一之利以厚居積樞子母爲事者也厚居積必月計之有餘樞子母必求倍入之息若計存本則日購問子母則無蓄甚且轉售乞假以補不足猶號於眾曰此吾致富之術也有是理乎嘗見富商大賈必擇忠信之人以主會計其入有經其出有節守餘三餘一之法核實厚積乃能久遠若主計不得人生之者寡食之者衆取之無度用之無節不旋踵而終雙用人理財之道與政通矣前者李鴻章沈葆楨創立此局謀深慮遠實爲經國宏謨固爲收江海之利以與洋商爭衡轉貧爲富轉弱爲強之機盡在此舉

洋人之通商中國斷不爲折閱而來乃招商局十餘年來不特本息不增而官款洋債欠負纍纍豈謀之不臧哉等語之案牘證之人皆知所謂利權上不在國下不在商盡歸於中飽之員紳如唐廷樞朱其昂之被參於前徐潤張鴻祿之敗露於後皆其明證王計之不得其人出入之經不能請求撙節又安得以局本虧折諉之於海上用兵耶臣等公同商酌該局既撥有官款又津貼以漕運水腳減免於貨稅其歲入歲出之款卽應官爲稽察擬請 旨飭下南北洋大臣欽遵光緒十一年八月十七日 諭旨澈底清查認真經理並將該局現存行海輪船幾隻行江輪船幾隻碼頭幾處船隻名目碼頭處所及總局分局委員商董銜名詳細造冊送部備考其每年承運官漕民貨所得運腳若干開支員董薪水輪船經費若干自本年一起每屆年終核造四柱清冊報部存案該局總辦由該大臣會商遴派嗣後派辦之員如有如徐潤張鴻祿之虧欠局款其原保及失察之大臣卽應請 旨交部議處以昭慎重得 旨如所議行○已酉兩○以本格署鑲黃旗蒙古都統長善署正紅旗漢軍都統奕謨署正白旗漢軍都統陸勳署正黃旗漢軍都統○庚戌諭前據軍統領衙門奏黑龍江布特哈副管博多囉等呈控該省地方諸弊及將軍文綰辦事廢弛各節當派希元查明具奏茲據奏稱調集人證卷宗反覆究詰或事出有因或懷疑誤控酌度案情分別擬結等語此案黑龍江前署刑司關防四品官扎拉豐阿承辦廣齊克扎布踢死

伊父佐領富明逆倫重案並未照例具案請奏且於富明所遺世職移知布特哈總管料理承襲時勿提此案實屬有心諱匿扎拉豐阿著交部照例議處副管特魯善雖無受賄縱賊實跡但扣留賊馬不卽呈報私給事主認領主事春山聽信文緒家人王明之言函致布特哈總管募化銀兩雖非扣留兵餉究屬擅自挪移布特哈總管請門德勒和爾當該主事致函時既不立時回卻輒由兵餉內攤扣原告副管博多囉佐領訥恩登額騎都尉景來所控各款情節雖非盡虛究多懷疑誤控均屬不合特魯善春山請門德勒和爾博多囉訥恩登額景來均著交部分別議處家丁王明假名募化銀兩跡近誣騙著照所議杖一百徒三年降調副都統博棟阿則辦賊匪尙有勞績著開復降調處分已革佐領莊慶於所進貂皮雖接管稍遲究未誤公著開復原官仍交部議處黑龍江將軍文緒於應奉事件雖因病未卽具奏究屬辦理稽延且於家丁募化銀兩失於覺察著交部議處餘著照所議辦理至所稱索倫五旗兵額應如何變通撥補之處著該將軍體察情形奏明辦理另片奏布特哈官兵苦累日甚請飭籌給津貼等語並著該將軍詳核妥議具奏○壬子劉秉璋奏准軍機大臣字寄光緒十一年九月初九日欽奉 慈禧端佑康頤昭豫莊誠皇太后懿旨前據左宗棠議擬海防善後事宜請裁額兵並減沿海水師艇船等因欽此遵旨寄信前來伏查浙省綠營兵丁從前定制本有三萬餘名同治七年變通營制案內共裁水陸額兵

一萬三千八百餘名僅存兵二萬二千五百餘名分駐十一府屬巡緝守護難議裁減前於光緒九年十一月二十四日經前督臣何璟會摺具奏迄今爲時未久分布巡防情形相似應請免予議減由臣行文各營按照減兵增餉章程屢次疲弱挑選精壯時常訓練定期合操於進退步伐擊刺陣式認真講求精益求精期於實有成效餉不虛糜具沿海水師各營額設戰船從前共有二百五十餘號兵燹之後購造本不及半前於光緒八年正月間准兵部行文議復直隸督臣李鴻章奏請酌裁金州營旅順口水師戰船並請將沿海各省額設戰船廢置無用者分別裁撤等因即經轉行藩司派委候補知府葉百川前往沿海水師各營逐歷查勘分別擬裁擬存有案現復體察情形逐加覆核擬請裁撤師船一十七號又停修舊艇三號酌留師船五十二號又改造添撥師船七號凡島嶼叢雜輪船素未往來汶港淺灘輪船難以直達之處不得不酌留艇釣各船以爲相輔巡緝之用日後浙洋如添派兵輪駐泊或現有營船不能得力容再隨時察看酌量裁減以節經費由藩司許應霖開摺具詳前來臣查浙省綠營兵額前於減兵增餉案內裁汰三成之一現祇二萬二千餘名分駐通省已形單薄實難再議裁減水師兵船本未足額現裁十七號已及三成尙有僱募紅單艇船十一號在洋巡緝尙稱得力擬俟洋面巡竣再行裁撤此本不在設額之列可以隨時核辦下所司知之○癸丑兩○欽奉 慈禧端佑康頤昭豫莊誠皇太后懿

有醇親王奕譞醇親王福鈞均著賞坐杏黃轎○慈寧端佑康頤昭豫莊誠皇太后履選秀女○子因公
溺斃廣東通判成彬優卹○甲寅諭軍機大臣等巴燕營領隊大臣長庚奏稱西北阿勒泰山宜早防守
踴金等處宜開屯田等語該大臣於邊隘地勢尚稱熟悉所稱各節不無可採著劉錦棠譚鍾麟鹿傳霖
剛毅按照該大臣所奏體察地勢情形詳細規畫妥議具奏○諭軍機大臣等劉瑞芬已到馬寶善先赴
英接任曾紀澤將經手事宜詳晰告知即行回華存撫英既未允所商分界各節關係綏重俟曾紀澤到
京後面加垂詢再行定議○乙卯欽奉 慈禧端佑康頤昭豫莊誠皇太后懿旨醇親王奕譞懇請收回
成命一摺情詞懇摯出於至誠實堪嘉許我朝親親之誼禮遇殊隆親王服色一體均有定例其從優加
恩之件如皇子分府後實穿金黃蟒袍賜戴紅絨結頂及公主賞坐杏黃轎乃係出自特旨非常賜賞
可比醇親王奕譞素來忠勤誠敬醇親王福晉溫恭淑慎均足為懿親矜式為天下所共知自皇帝入承
大統以來醇親王及福晉翼翼小心愈加謙謹恭諸史牒實為從來所未有皇帝念勤與學志承順宮
闈豫順之歡尤非語言可罄昨降旨賞坐杏黃轎實因醇親王及福晉德性福澤足以承受是以特沛殊
施王其謹受恩命毋庸固辭○大學士北洋大臣李鴻章與法國來使戈可當等在天津會議越南邊界
通商章程十九款成其文曰大清國大法民主國於光緒十一年四月二十七日即西曆一千八百八

十五年六月初九日立定條約第六款內開北圻與中國之雲南廣西廣東各省陸路通商章程兩國派員會議另定條款附在本約之後又第十款內開中法兩國前立各條約章程除由現議更張外其餘仍應一體遵守等語是以 大清國 大皇帝欽差全權大臣太子太傅文華殿大學士北洋通商大臣會辦海軍事務直隸總督一等肅毅伯爵李鴻章大法官主國大律師天德欽差出使中國全權大臣御賜佩帶榮光四等寶星並義國冠冕二等寶星外務部交涉科侍郎戈欽命頭等領事官幫辦議約事務御賜佩帶瑞典國巨斯達洋薩三等寶星並比國禮阿波勒德五等寶星卜各將所奏全權文憑互相校閱均屬妥協議條約如左 第一款 一兩國議定按照新約第五款現今指定兩處一在保勝以上某處一在諒山以北某處中國在此設關通商允許法國即在此兩處設立領事官該法國領事官應得權利即照中國待最優之國領事官無異現條款引押時兩國勘界大臣尚未定議其諒山以北應開通商處所本年內應由中國與法國駐華大臣互商擇定至保勝以上應開通商處所亦係兩國勘界定後再行商訂 第二款 一中國可在河內海防二處設立領事官隨後與法國商酌在北圻他處各大城鎮派領事官駐紮至法國待此等領事官並該領事官應得權利即照法國待最優之國領事官無異其所辦公事應與法國所派保護之大員商辦 第三款 一兩國議定於彼此派領事官前來駐紮時所住公館由兩國地方官相幫照拂至法國商民前來中國邊界通商處所均照咸豐八年五月十

七日中法條約第七十一十二等款辦理越南人到中國邊界通商處所中國亦一體優待 第四款 一越南各地方聽中國人置地建屋開設行棧其身家財產俱得保護安穩決不刻待拘束與最優待西國之人一律不得有異中國官商所寄往來公文書信電報經法國郵政電報各局一律遞送並不阻止中國待法國人亦照此一律優待 第五款 一法國人及法國所保護人與別國居住北圻人等欲行過界入中國者法國官查明係體面之人即請中國邊界官員發給護照准其執持前往回日將照繳銷每過領照之人如必應路過土司苗蠻地方應先在照上寫明該處無中國官不能保護至有中國內地人民欲從陸路由中國入越南者應由中國官查明係體面之人請法國官發給護照一如法國人入中國辦法至彼此所給護照皆只爲游歷而用不准作爲買賣貨物免稅憑據凡有人民之未領有護照而過邊界者其在中國則聽中國地方官扣留其在北圻則聽法國官員扣留彼此即交各本國官員酌量情形審辦至僑居越南之中國人民由北圻回中國者只由中國官自發憑單准其過界若邊界通商處所法國人等有出外游歷者地在五十里內毋庸請照 第六款 一凡進口之貨由法國商民及法國保護之人運至邊界通商處所已納進口稅即可照舊後章程第十七款及各海關通行運洋貨入內地稅單之定章准其入中國內地銷售凡各項洋貨進雲南廣西某兩處邊關者於到關時即將貨色

件數及運貨人姓名報明由關派人查驗屬實按照中國通商海關稅則減五分之一收納正稅如稅則未載即按估價值百抽一徵收正稅須俟正稅完清後方准起棧過載出售如該商願將洋貨運入內地須再報關照通商各海關稅則收納內地子口稅不得援減五分之一之正稅折半徵收此項子口稅完清後由關發給稅單准其持往所指之地方售賣凡遇關卡概不重徵倘無稅單運入內地者應照土貨之例逢關納稅遇卡抽釐 第七款 一凡法國商民及法國保護之人赴中國內地各處購買土貨運至邊界通商處所出入口北圻者均可照善後章程第七款運貨出口之例辦理凡各項土貨運出雲南廣西某兩處通商處所於到關時即將貨色件數及運貨人姓名報明由關派人查驗屬實如係該商先領三聯單口赴內地採買並未完過內地稅釐者應照中國通商各海關稅則先徵內地子口稅再照中國通商海關稅則減三分之一徵出口正稅如稅則未載即按估價值百抽五徵收正稅方准起棧過載販運出關倘該商入內地買土貨並未領有三聯單者所過內地關卡仍應照完稅釐山關卡發給單票為據其抵關時驗有內地稅釐單票始准免子口稅凡法商等進出雲南廣西兩邊關運貨之車輛牲口中國商民進出北圻運貨之車輛牲口彼此一體免收鈔銀其進關水路通舟楫之處彼此可照各海關例收納船鈔以上第六第七兩款兩國議明日後倘有他國在中國西南各陸路邊界通商另有互訂稅

則法國亦可一體辦理 第八款 一洋貨到邊關已完進口正稅後復因不賣轉往彼邊關者如在三十六箇月限內驗明原貨並未拆動抽換則此邊關將已收之正稅發給免單准其持往彼邊關以抵應繳之稅或發給存銀票准其於三年內留抵下次應繳本關之稅概不發還現銀若將此洋貨轉入中國通商各口應照各海關洋貨進口例另收正稅不准以此項邊關存票免單作抵亦不准以此項邊關已完之稅單作抵以免輕輻至已完內地子口稅仍照各口向章概不准發給存票免單 第九款 一土貨已在此邊關完過子口稅出口正稅復轉往彼邊關售賣者到彼邊關後只照原納正稅之數收復進口半稅但須照各口定章不准洋商販入內地倘將此土貨轉入通商各海口應概照各海關洋貨進口稅則一律辦理另徵正稅倘入內地仍完子口稅如有土貨出中國海口進越南海口復往中國邊界入關應照洋貨一律徵收正稅倘入內地仍完子口稅 第十款 一進出口之貨到中國邊關即請查驗不得逾十八箇時辰如逾期不報每日罰銀五十兩惟此罰銀至多不得過二百兩凡過關報貨時若心存欺詐以多報少冀減其應納稅項查有確據即將貨物全罰入官若無關監督准單私自過關起卸繞路拆賣及一切有心偷漏等弊亦將貨物全罰入官凡有商人報關請領內地稅單心存欺詐或捏報貨物名色件數並所出所往之區不符者亦將貨物全罰入官至其如何審辦應照同治七年閏四月初八

日章程辦理其罰令入官之貨如商人願將原貨作價交官准其與中國官按照原貨估價交官亦可至中國沿邊一帶凡有嚴防偷漏之法皆由中國官相度機宜隨時便宜設法辦理其中法以及越南船艇上下水道每過彼此邊關之時倘無單貨不符等弊可毋庸卸貨登岸只由關道差上船查驗 第十一款 一中國土貨由陸路入北圻者照法關稅則完納進口稅若係出口一概免稅日後法國在北圻另定稅則章程隨時知照中國倘北圻境內將來另定越南數種土貨製造及金銀保真等稅中國若有此等貨運入北圻亦應照徵 第十二款 一凡運土貨由中國此邊關路過北圻至中國彼邊關者或山兩邊關運出越南海口回中國者其過北圻時應照法關稅則完納過境稅均不得過貨值百抽二至此項貨物於出中國後應由法國邊關查驗給發貨單詳開貨物名色件數並所往之處等語該商人執此貨單每過法官案驗卽應沿途或抵海口後呈閱但此項土貨運入北圻後應先納進口正稅以防偷漏卽由法關給發單照以便於抵海口或至邊界時呈驗並由法關在原納進口正稅內扣去過境稅銀仍將餘銀給還該商人卽將前次已領之收稅單呈繳註銷惟此項土貨運過北圻既係新章倘該商報法關時心存欺詐捏報貨物名色件數并所出所往之處不符查有確據者卽將貨罰入官其罰令入官之貨如商人願將原貨作價交官准其與法國官按照原貨估價交官亦可至中國土貨出各海關運入

越南海口過北圻進邊關者其在越南境內亦應照以上過境稅則一律辦理 第十三款 一凡有金銀外國各等銀錢麪粟米粉穀米麪餅熟肉熟菜牛奶酥牛油蜜饌外國衣服金銀首飾機銀器香水碱炭柴薪外國蠟燭煙絲煙葉外國酒家用雜物船用雜物行李紙張筆墨靴鞋鐵刀利器外國自用藥料玻璃器皿以上各物進出口由中國邊關驗明確係外國所產洋人自用數目無多准給免稅單放行倘不報驗不請免稅單私自起運者照商貨走私例罰辦至若運往內地除金銀外國銀錢行李三項仍毋庸議外其餘各貨即係洋人自用數目無多皆按稅則每貨值百兩完納內地子口稅銀二兩五錢凡中國人之出入北圻邊關者隨身所帶行李衣服首飾紙張筆墨書籍及自用家伙食物到法越關一概免稅至中國領事官所運自用各貨亦一律免稅 第十四款 一兩國議明洋藥土藥均不准由北圻與雲南廣東廣西之陸路邊界販運買賣 第十五款 一米穀等糧不准販運出中國邊關如係進關准其免稅至火藥彈子大小鎗礮硝磺青白鉛一切軍器食鹽及各項有壞人心風俗之物均不准販運進關違者即查拏全罰入官其軍火各項如由中國官自行採辦或由商人特奏准買明文須由關查驗明確方准進關日後可由中國大員先商法國領事官准將兵器軍火過北圻運進邊界則法國關全行免稅至一切兵器軍火及各項有壞人心風俗之物亦不准販運進北圻 第十六款 一中國商民僑

居越南所有命案賦稅詞訟等件均與法國相待最優之國之商民無異其在邊關通商處所華人與法人越南人詞訟案件歸中法官會審至法國人及法國保護之人在通商處所如有犯大小等罪應查照咸豐八年條約第三十八三十九等款一律辦理 第十七款 一中國邊界某某通商處所倘有中國人民照中國律例無論犯何罪名逃入法國人或法國所保護人民寓所或商船隱匿者地方官照會領事官查明罪由即設法拘送中國官審辦至中國人民因犯法逃往越南由中國官照會法國官訪查嚴拏查明實係罪犯交出照法國與別國所訂互交逃犯之約最優之章辦理其法國人民及法國保護之人犯法被告逃往中國者法國官照會中國官查明實係犯罪設法拘送交出法國官審辦彼此不得稍有庇匿 第十八款 一此次所訂陸路通商各款如有未詳備者應查照中國通商各海關章程與現在通行條約相符者辦理倘再有未訂之事應由兩國官員各請示於本國以上各款將來如須續修即照新約第八款所載換約後十年之期再行商訂 第十九款 一此次兩國會議通商條款俟兩國批准後應在中國法國及越南頒行周知一體遵守仍於畫押之後多至一年為期在中國京都互換○以劉永福為廣東南澳鎮總兵○丙辰 上詣 奉先殿 壽皇殿行禮○丁巳諭劉銘傳奏澎湖為閩臺門戶非特設重鎮不足以資守禦楊昌濬與該撫意見相同擬將澎湖副將與海壇鎮對調仍歸總督

管轄等語卽著楊昌溶劉銘傳會同籌議具奏閩臺防務關緊要該督等商辦一切務當和衷共濟不分畛域力顧大局上年諭令該督等會議臺灣改設事宜并著一切妥議毋稍遲延○以海英署鑲黃旗蒙古副都統祥麟著正白旗蒙古副都統明魁署鑲白旗蒙古副都統明秀署鑲白旗漢軍副都統○撫恤琉球遭風難民○戊午諭都察院奏據湖北民人趙豫坤等以書吏私收錢糧等項民苦已極等詞赴該衙門呈訴案關書吏舞弊違例苛徵虛實均應澈底根究著裕祿譚鈞培親提人證卷宗秉公研訊務得確情按律定擬具奏原告民人趙豫坤余小卿等該部照例解往備質○己未予頒越勘界受瘡病故耶申關胡宗優卹○壬戌張曜奏准於光緒十一年十二月二十八日行抵山東武定府境先赴下游查勘黃河徒駭兩河入海之路當經具奏在案○循徒駭河北岸而行至沾化縣之流鍾鎮卽流鍾口該處近三四年間黃流海潮互相衝刷其河寬五六丈水深二丈三四尺順河七十里至陳家廟又七十四里至海口自陳家廟以下河面愈寬河底愈深海口近處向無民居訓據陳家廟商民船戶敘構從前海船小者至陳家廟近年大船亦可通行此徒駭河海口之情形也由陳家廟查勘至鐵門關該處附近河寬二百三四十丈水深一丈七八尺自鐵門關以下二十五里北有大堤行四十里至蕭神廟以下蓋牡蠣嘴以至海口正溜水深一丈二三尺至一丈五六尺不等漫灘寬處一望無際鐵板沙自牡蠣嘴以下

間段有之尼閘宣洩不能通暢此現在黃河海口之情形也折山利津循河而上節節履勘至濟陽齊河之間察看徒駭河中段形勢連年黃河北岸決口衝溜徒駭查徒駭河身臨邑境內以至流鍾鎮以上河身過窄水不能容以致漫漶東流南岸地方被淹較寬村落蕭條人民半多遷徙又歷齊河長清東阿北岸行抵張秋鎮卽從濮范循河而西查勘上游自壽張縣境內起以至豫省滑縣境內舊有金堤一道計長二百六十餘里黃河改道以來大溜曾過金堤從未漫溢上段爲直隸關闌下段爲東昌屏蔽嗣因大溜南滾又加臨黃堤一道現在黃河距金堤雖遠滾溜無常金堤仍宜加意培修自連河迤西以至上游東直境內堤工修防均經周密惟孫家樓賈莊兩處地勢低窪緊逼大溜工程最爲險要上游河面寬展盛漲能容但力守大堤可保無虞又自連河東岸下至長清縣韓家林止此一百三十里間其地南面多山愈南則地勢愈高近河低處盛漲之時或有漫溢尙無衝決之患北岸挂劍臺以下至齊河均有大堤中間黃家渡豆腐窩等處地勢低窪修防緊要自商河歷城以下以至利津河面既窄河身又高現在南岸何王莊以下以至齊東蒲臺民埵內外均有黃流目前之計南岸惟有力護遙堤北岸則須增培民埵以保完善之區至河身灣曲則有回流南有沙嘴北有頂衝凡抽溝切灘及埵內月堤套堤格堤一切防禦之法均宜隨地設施以盡堵築之力鐵門關以下北岸已有長堤二十五里應將南岸一律增築接至

肅神廟止庶東水歸槽大溜不致散漫至肅神廟以下多係淤灘添築大堤難期穩固所有鐵板沙上面乾結二尺以下仍是泥沙人力縱能挑挖距岸較遠運送太難擬在近溜河灘濬度水勢挑挖川字引河藉水力衝刷以期逐漸深通至於水底淤沙人力難施擬兼用機器船隻隨時淘濬以現在黃河入海之路無可改移惟有於鐵門關外力求疏濬而已又查大清河以南有小清河一道上年撫臣陳士杰曾經挑濬嗣因黃水灌入以致淤墊海口地勢稍高積淤未能迅視此時仍須挑挖以暢南岸清水各河入海之路徒駭河北岸臨邑商河惠民連年堵水已經築有堤埝惟濱州所管之四十四里因北岸村莊過少未及修築現在籌計惟有將徒駭北岸已築堤者加高培厚未築堤者接續添築以上堵築疏濬各事均與撫臣陳士杰往返函商意見相同統計黃河形勢總慮盈滿爲災減水分流實爲當務之急御史黃煦原奏有分水入徒駭二河之議翰林院侍講學士惲彥彬原奏亦有減水之說與侍郎游百川從前所奏意指相同惟減水必居上游方能得勢查長清北岸之烏龍潭迨王河等處雖可分入徒駭但該處民間未曾深受黃水之害一經開挖終懼必多棄地地毀雖屬上游辦理恐多窒礙惠民境內南北王莊附近之白龍灣兩河相距不過十餘里開通最易然地處下游不足以減上游水勢惟有在齊河以下李家岸趙莊之間築壩挑河計地不過十里即可通入黃水連年入徒駭之路接挖河身以達徒駭計長八十餘

里徒駭河自臨邑縣田家口起至霑化縣流鍾鎮止計長二百三十里一律挑挖寬二十四丈深一丈五尺卽以挑挖之土培築兩岸堤岸至減水壩壩面向比水高水漲則流水落則止但黃河漲落無常壩高不能過水壩低又慮壟溜籌計再三祇有建造帶閘石壩一連十二孔每孔口門一丈八尺閘以高出堤岸爲度約計二丈六尺下鋪根腳計寬六丈頂面寬二丈四尺石壩以內仍應鋪築石板以防跌塘之患近壩兩面各築石堤一段與壩相接此與前河臣靳輔所造七洞減水壩辦法大略相同按閘門十二孔每孔寬一丈八尺共二十一丈六尺以過水高一丈二尺計之每丈放水十二方共可放水二百五十九方有零啟閉有時多寡有效其權在人而洩漲之功無壟溜之患此因地制宜之法俟辦有成效咸知有益無害卽於附近地方相度形勢逐漸增造經費一項河臣靳輔南河報造單孔石閘每座估銀二萬兩今以十二孔計之爲數雖須加增山東係產石之區購辦較易當可減省將來再由承辦之員詳細估計至於疏濬河身培築堤岸東省工程向有定章所需經費應由撫臣核計從來治河原無上策況臣智識疏庸惟有博訪周諮參以成法就人力所能行勉爲籌計 上諭張曜奏查勘山東黃河情形及黃河舊道酌擬辦法開單呈覽各摺片著工部妥議具奏單圖併發○張曜奏臣承准軍機大臣字寄光緒十二年三月十一日奉 上諭張曜奏遵查山東黃河情形繪圖呈覽暨機器船隻做法量爲變通及查看黃

河故道各摺片等因欽此。查明何王莊漫口情形於二月二十五日拜摺後即行啟程循東豫乾河口至江蘇揚州豐縣入南河地面往來兩岸詳細履勘查白河南關儀縣乾河口起至江蘇清河縣北岸楊莊止計長九百八十二里又自楊莊下至安東縣雲梯關止計長二百二十六里又自雲梯關至阜寧縣小沙口海口止計長一百六十里所有關儀以至楊莊河身淤高之處計一百二十八段河身以內從前正洪緊溜地勢低窪間有積潦未能舉種此外淤灘多爲民間開墾田岸河堤從前有就堤築壩挖斷堤身者一百八十餘處此查勘黃河舊道現在之情形也伏思開通黃河故道引河南行誠足救山東河患之急惟辦理實有三難自關儀乾河及雲梯關以至海口開挖全河普修大堤經費動需千萬當茲庫藏支絀何由籌此巨款以興大工此一難也凡河灘墾種之人曹徐淮海四屬居多風氣素悍一旦奪其生業第無所歸此二難也十餘年來洪澤湖水勢愈弱引入運河浮送糧船已覺大費人力今如全河南行黃運交匯之處黃水勢猛湖水力弱一經倒溜關繫匪輕此三難也惟山東河患日深若不亟籌補救恐此後受害不盡山東一省連年東省黃河漫決多在下游故受害悉在東境一旦上游北岸漫決水必直趨運河害且中於直隸上年靜張境內孫家馬頭稍有漫溢黃流已達東昌若非橫決運堤其勢必迫臨清近燕濟陽北又復漫口水仍歸入徒駭倘被壅助大溜徒駭一河斷難容納水性就下勢必漫入馬頰

至蘭儀乾河口從前高出水面計有兩丈近歲以來伏汛漲時僅有六尺再歷數年誠恐黃流自尋故道衝入南河河身未濬堤岸未修四出奔流猝不及備爲患何堪設想竊以全河挽歸故道勢實難行減水分入南河事尙可辦自蘭儀以至清河縣屬之楊莊此九百八十二里內沙淤墊高計一百二十八段統長二百三十里等必須分別挑挖期與上下相通其餘七百五十餘里從前正洪緊溜至今尙有河槽南河以北廳境內舊日決口迄未堵築跌塘之處積水尙深略加修濬日引河補築新堤決口約計工料所費無多楊莊以下海口河身中間現有小河雖不甚寬如遇盈滿出槽仍在河身以內不足爲患無須另再挑挖綜計南河上下游形勢若分黃流十分之三足以容納惟蘭儀乾河口必須橫築大堤緊接兩岸中間建造帶閘石壩分水多寡庶有限制三年之間如有積淤霜降以後酌量挑修以上築挑工程各處情形不一應由沿河該管河道按地段力求撙節核實估計卽責成該管道員承辦呼應既靈集事較易至兩岸大堤既因築壩挖斷自應仍由民間補修無須另給工食議者每謂黃河不宜分流漢時河入于乘王景治之德棧之河播而爲八無河患者數百年此分流之明效也近如蒙澤中牟鹽北以及銅瓦廂前後十六年間四次漫口此河不分流不能無患之明證也河務關係重大必須慎之又慎臣與沿河官紳耆老虛心諮訪僉以爲似此辦法工省費輕有益無害惟臣智識疏淺思慮維周是否可行謹繪圖貼

說並繕工程清單摺具奏 上諭前據張曜奏巡查山東黃河一摺本日復據該撫奏查勘黃河故道情形酌議減水分入南河及建造閘物料宜歸東省承辦各摺片已明降諭旨令工部議奏矣該撫前摺所稱擬將徒駭北岸已築之堤加高培厚未築處所接續添築並詳陳建造帶閘石壩辦法卽著張曜會商陳士杰先行詳籌妥辦免致黃河橫肆泛濫以保完善之區是爲至要○陳士杰奏臣前因病重蒙恩兩次賞假調理將次就痊而桃汛已到據報三月初一日起至初六日止水已漲至六尺三寸爲歷年所未有河防緊急臣當於初八日力疾銷假正擬親行巡視初十日接據署章邱縣知縣吳寶三稟稱連日水漲異常加以狂風暴雨初六日四更時分南岸吳家寨大堤漫溢一處又據署濟陽縣知縣慶錫仁稟報日來風急水湧高過堤身北岸十里鋪民稟安家廟大堤同時漫溢十一日復據慶錫仁稟報該縣與惠民縣毗連之王家園民稟當衝頂溜初七日風雨尤猛遂行衝決大溜循水溝直衝霍家莊大堤堤後陡出翻花浪搶護不及堤身頃刻塌陷同日又據署惠民縣知縣沈世銓稟報該縣北岸姚家口民稟並套捻水力過猛一齊衝決其水直灌陳莊廨任陳莊該處大堤地甚低窪勢同建瓴水撲堤頂隨卽刷開兩段得信當飭前臬司潘駿文前往查勘二十一日回省稟稱勘得南岸章邱之吳家寨北岸濟陽之安家廟兩處大堤漫溢處所均經在工員弁隨卽搶堵穩固惟王家園民稟決口寬約八十丈其水

直衝霍家莊大堤刷寬四十四丈口門水深四五尺及一丈不等溜向東北趨入徒駭河約三十里比較
早年在桃園顧家溝李家岸趙莊決入徒駭河地勢約近三四十里又勘得姚家口民埝寬約六七十丈
水深自一二尺至一丈七八尺不等衝開陳家廟任陳莊大堤大小六口共寬二百餘丈水深六七尺至
一丈不等溜勢進向東北約二十里入徒駭河此即光緒元二年白龍灣黃毛墳決口山徒駭河入口之
故道也臣與河防局司道悉心商度目下堤埝內外背水取土無地堵築實難施工即令勉強堵塞而下
游河身節節淤墊伏汎踵至防不勝防勢必此堵彼決徒耗財力查黃流東徙以來三十二年中南決入
小清河者四次北決入徒駭河者二十餘次水性就下其勢使然且海潮倒刷而上已過雷化流鍾口直
接瀕州境地河身寬三四十丈深四五丈不等海潮上迎黃河行將改道天若微示其機臣自九年到東
與倉場侍郎臣游百川建議分水徙駭奏旨俞允比時紳民不及遠慮多方阻撓遂行中止上年趙莊
開口臣復擬留此口門藉以分溜繼思兩岸未經築堤河身未加疏濬仍恐漫溢爲災是以復行奏請俟
趙莊堵築後再行辦理臣以辦工必在汎前轉帳需時將來勢必趕辦不及因於二月初旬派候補知府
胡鳴泰候補知縣何式箴前往督同沿河各州縣催集民夫復修民埝以備不虞嗣據報臨邑商河濟陽
北岸舊有民埝經該守等督催業經加培高厚此外惠民民埝僅築一段瀕州雷化甫經動工黃水已至

辦理殊費周章再四思維目下只好將王家園姚家口兩處口門各築挑水壩一座挑開溜勢冀免全河
奪溜堤岸之間各築橫堤一道以免漫溢爲災俟伏秋大汛過後查看形勢何處宜堵何處宜溜再行相
機辦理水分則力弱一經順軌分入徒駭下游水患當可稍舒惟臣才短病多宜防三年毫無寸效應請
旨將臣褫職另擇賢員接辦以免貽誤生靈其承守員升署惠民縣知縣沈世銓應請摘去頂戴仍留
署任候補副將陳長發應請革職留工以示懲儆而觀後效著濟陽縣知縣慶錫仁到任未及一月應請
從寬免議至被災各處現已飭司委員分途散放急賑並分飭各州縣清查戶口迅速稟報擬將 恩准
截留米石均勻散放俾令普及 旨仁俟各縣查覆後核明應放數目另行具奏 上諭陳士杰奏挑濟
盛漲大堤漫決分別籌辦情形一摺本年三月間山東黃河水勢盛漲章邱濟陽惠民等縣大堤先後漫
溢決口多處雖將吳家寨屠家廟兩處搶堵而王家園姚家口等處口門甚寬被淹甚廣該省頻年迭遭
水患朝廷軫念災區時深慮系此次大堤復被衝決小民流離堪憫前曾特降諭旨截留山東
新漕米六萬石此時恐又不敷散放著再加恩截留新漕四萬石並隨漕輕齎等項銀兩一併散放以資
賑濟該撫迅速查明被災處所派員分別辦賑並飭各州縣清查戶口均勻散放務使實惠普霑毋稍弊
混陳士杰疏於防範咎無可辭著革職留任著惠民縣知縣沈世銓著摘去頂戴仍留署任候補副將陳

長發著革職留工以示懲儆餘著照所請辦理該部知道○署吏部左侍郎周家樹因病乞休不允徵假一月○以孟夏時享 太廟 上前期親詣行禮○是月日斯巴尼亞國使臣薩時鐸回國參贊鄂尼思署理○日本國新簡駐華使臣鹽田三郎抵任

光緒七十六

臣朱壽朋敬編

臣章圭璩恭校

夏四月癸亥朔丁寶楨奏前准軍機大臣字寄光緒十一年五月十三日奉 上諭理藩院奏遵議丁寶楨請准作了入貢一摺等因欽此欽遵並原摺內開 臣等詳察作了尼們罕呼圖克圖或即係前次作了諾們漢所呼圖克圖名號並換勒印迄今尙未請領該督所奏作了尼們罕呼圖克圖或即係前次作了諾們漢所稱從前隨征廓番等處給予該呼圖克圖號紙一節並未聲明何年所得且未悉號紙是何執照難免夷字譯漢之誤其所請查照成案給予頂戴之頭目又非當年瞻對案內之名僅稱從前隨征廓番等處給予究係何年亦未聲敘若以現在欲行呈進 貢物遽行請給頭目頂戴勢難照准查番官番目戴用何項頂戴 臣院無案可稽駐藏大臣自有查考 臣等公同商酌議請 飭下四川總督會同駐藏大臣逐一詳細查明辦理至該呼圖所請隨同察木多進 貢一節自係出於至誠未便阻其向化惟事屬創始是否隨同察木多按班一併齎京呈進何項 貢物人數若干該督均未聲敘勢難含混且現在各直省差徭苦累究應如何辦理擬請由四川總督會商駐藏大臣詳細妥議明定章程請 旨遵行等因知照到

臣遵卽轉行去後茲據督打箭爐同知石光熙管理巴塘糧務周上達查明該乍了前輩喇嘛洛宗駒甲於康熙五十八年蒙 賞諾們罕職銜日信號紙旋因寺燬於火號紙亦被焚化乾隆二十四年洛宗巴登丹必吉村蒙 賞黃教傳法呼圖克圖諾們罕職銜道光十九年土登局量曲吉甲錯蒙 賞給號紙又因隨征廓爾喀出力咸豐六年蒙 賞加各額旗簿本鄂烏布卡千世銜名同治五年鄂汪龍都丹必吉村因剿平瞻對出力蒙 賞加諾們罕呼圖克圖職銜並換敕印尚未請領總堪布蒙 賞加呼弼勒罕職銜頭目等均蒙 賞給頂翎各在案今擬選派大堪布一名隨帶跟役四名管家郎索一名隨帶跟役三名大通事一名跟役二名小通事譯字房各一名各帶跟役一名業巴二名跟役二名徒衆五名共二十四名恭齋吉祥哈達一根銀曼達一個哈喇瑪萬壽佛一尊金字長壽經一部金塔一座銀八寶一副 貢香二百把各色藏片十方各色氍毹二十五根參佛手參黃連各八百兩蟲草五十兩知母長藤果各一百斤虎皮烏雲豹皮金錢豹皮艾葉豹皮猢猻皮狐皮沙狐皮各一張定於十二年敬謹呈進以後照此按察本多例 貢之年一體隨班進 貢等情具稟請奏前來臣查乍了諾們罕即諾們漢尼們罕譯音原無定字該番自康熙乾隆迄咸豐同治歷蒙 列聖恩賞職銜此次呈請入 貢又蒙 俞允該番等尤異常歡欣感戴合無仰懇 天恩准如所請准照擬定 貢品人數於十二年入 貢並准

以後照此按察木多例 貢之年隨班齋京呈進以遂其瞻 天向化之忱應用夫馬口糧按人數照察
木多之例動支其此次進 貢人等各用本身頂戴到京後如荷 恩施所有請 齋呼圖克圖擬請
賞加阿吉呼圖克圖名號換給敕印並請俟 頒發敕印後再令將原領敕印呈繳俾資信守倉儲把總
堪布洛宗丹增請 賞加呼畢勒罕名號四品花翎頭人扎喜魯秀五品花翎頭人鄂烏白登江錯均
請 敕理藩院從優議獎隨從番眾按例一併給 賞用示懷柔而固邊圉 旨如所請行○甲子諭
有人奏署澤州知州郭奇中徵糧折價不實並藉差浮收車價緣案勒罰銀兩且於搶劫重犯並不認真
緝捕任聽門丁書役等朋謀舞弊等語著李鴻章確切查明據實具奏○丙寅大祀 天於 闕丘遣世
鐸恭代行禮○命福銀潘祖蔭查勘 天壇工程○己巳雨○庚午劉錦棠錫綸奏光緒十一年十一月
二十八日准兵部咨遵 旨議擬劉錦棠等請將巴里坤等處游營歸併古城並添設城守尉一摺古城
地當衝要旗營歸併於此自不可無專員鈐束以重責成該處本有領隊等官業已奉 旨裁撤應如該
撫等所請准其添設城守尉一員其佐領防禦以下應否仍舊及新設城守尉歸於何處管轄應請 旨
飭下伊犁將軍新疆巡撫體察道里形勢會商奏明辦理等因奉 旨依議欽此欽遵咨行前來竊維設
官分職 國家自有常經 臣等何容置議惟新疆事經創始無可率循此次議設城守尉尚未酌定山何

處管轄經部臣議令臣等會商具奏敢不悉心以熟籌之查古城爲新疆東路距省四百餘里聲息相通伊犁在其西二千餘里山川綿亘中隔數城文報往來動需時日以道里形勢而論遠近判然不同臣等往復函商意見相同擬請將新設古城城守尉援照河南及山西太原城守尉之例歸於新疆巡撫臣兼轄是否有當伏候 聖明採擇現在領隊等官既已奉 旨裁撤各旗營兵丁誠不可無專員鈐束且歸併古城之議發已經年各旗營計日待遷亦不容再緩新設城守尉員缺蒙 恩俞允應請 旨迅賜簡放以便各旗營得以從速遷移至在領防禦等官員應否仍舊應俟城守尉到任再行會商核辦其各旗營兵丁花名清冊現飭分別造報俟造齊到日再當送部備查得 旨允行○辛未岑毓英奏據署雲南布政使史念祖詳稱查現在奏准開化臨元兩鎮總兵每年於秋冬兩季出駐白馬關蒙自縣以開化中營游擊常駐白馬關添設開化鎮後營游擊一員駐開化府城以開化左營都司分防攸趾城右營都司分防古林箐石榴紅汛都司改爲守備移一守備於長嶺岡其蒙自縣一面添設臨元鎮標前營游擊一員常駐蒙自縣原駐蒙自縣之右營都司改爲分防寧頭水田原設右營守備改爲分防蒿枝地原設曲江壩之臨元鎮左營都司改爲分防箇舊廠又雙水塘同知亦改設箇舊廠除守備以下鈐記俟司議定由司刊給外查新添之開化鎮後營游擊關防一顆臨元鎮前營游擊關防一顆亟應添鑄移駐白馬關

之開化鎮中營游擊關防一顆移防陵川城之開化鎮左營都司關防一顆移防古林營之開化鎮右營都司關防一顆移防署頭水田之臨元鎮右營都司關防一顆移防簡葛廠之臨元鎮左營都司關防一顆又雙水塘同知移設簡葛廠關防一顆均應改鑄理合造具印模清冊詳請奏明改鑄頒發以昭信守等情前來臣覆查無異謹恭摺具陳得 旨禮部知道○閣敬銘等奏臣部前因各旗支領庫銀查有浮支情弊當於上年十一月十二日兩次具奏奉 諭旨飭查在案當經開具查出浮多名數分咨各旗令其據實聲覆嗣據各旗陸續聲覆情形不一或稱筆畫訛錯或稱滿漢字音相類或稱缺已改補漏未更換花名或自認一二錯誤餘皆謬為無從查考所敘情節參差不同經臣部迭次駁詰始終未能聲覆明晰臣等查此案應查之項重在重支及花名不符之二端重支一節既經臣部按冊查出自應逐名追繳其花名不符一節現經各旗聲覆均未能一律清楚設再事煩查徒延時日臣等公同商酌擬就該旗所報情形斟酌定擬除聲覆明晰實因筆畫錯誤滿漢字音相類及改補漏未更名各情均係無關重支之弊應即開除不究外其餘統聲敘並未逐名聲覆其有謬為無從查考者均擬一併列入重支著賠歸款其分賠成數應以造冊外錯之各旗參佐領及經手辦事之領催為最重此項員弁擬著落賠繳七成管旗營之都統大臣擬請分賠二成臣部堂官及俸餉處司員亦擬分賠一成以示區別均予限半年繳齊

謹繕浮支銀數清單恭呈 御覽然此猶指款項而言也臣等竊謂天下積弊皆起於簿書叢雜之中而胥吏之因緣爲奸有司之鈎稽不密皆能使良法美意盡變爲蠹政之資卽如此案各旗營所行印冊種種訛謬等固不必過事吹求第就臣部俸餉處而論該司員稽核冊檔是其專責不應然視無睹至經手書吏勾通朋比上下其手尤難保其必無又安得以事無證佐概從寬宥除俸餉處掌印員外郎福誠因嗜好太深辦公弊混前已參革外員外郎鍾英一員首先查出應予免議至臣部堂官與該處總辦管股各司員皆有失察之咎應請 旨交部議處俸餉處各股書吏人數衆多除正紅一旗浮支銀五兩毋庸置議外其餘各股經承均擬斥革杖六十徒一年俟奉 旨後札順天府照例辦理此係仰體 朝廷法外之仁從寬發落後再有犯不得援此冀邀幸免至各旗營領催等應如何懲辦之處由各該旗自行定擬完結再八旗庫銀一項積弊日深現就一年之中查出如許鉅款從前浮領之弊不問可知今雖懇恩免其既往尤必須嚴定考核以杜將來謹擬定章程十條恭候 欽定 上諭戶部奏查明八旗重支庫銀著落分賠並釐定章程開單呈覽一摺此案各旗浮領庫銀前經降旨派令各該都統等查明數目花名分晰咨部核議茲據戶部按照各該旗所報各冊查出重支數目有一萬二千五百餘兩之多自應著落分賠歸款著照該部所擬分成賠繳勒限半年繳清戶部俸餉處司員稽核冊檔是其專責何以

於各旗營餉冊外錯漫無覺察該部堂官未能查出亦有失察之咎除員外郎鍾英首先查出准予免議外所有戶部堂官及俸餉處承辦各司員均著查取職名交部議處俸餉處書吏朦混舞弊大干法紀而應嚴行懲辦所有各股經承該部擬以杖六十徒一年不足蔽辜著改為杖一百徒三年以示懲儆八旗支領庫銀積弊甚深不可不認真懲剔此次戶部所定章程十條尙屬周密嗣後該部及各該旗務當詳慎稽核實力奉行不准再有絲毫弊混○癸酉 上諭北海 永安寺拈香○乙亥 上諭 永安寺

普晉殿拈香○丁丑劉錦棠奏竊臣准刑部咨開議奏嗣後新疆命盜等案應照例定擬罪名專摺奏明請旨俟奉准部復將應行立決人犯再行處決應入情實緩急各犯歸入秋審辦理其遺軍流徒各犯卽於南北互相調發等因奉 旨依議欽此仰見 朝廷明慎用刑矜卹庶獄之至意臣自應恪遵辦理惟新疆情形與內地迥別駁回雜處種類繁多混混勢勢罔知畏法加之地方遼廓稽察難周游勇潛蹤動輒滋事若輩視指劫殺人爲故常臣前於命盜案件奏請變通辦理願期辟以止辟而數年來劫殺之風猶未盡息蓋習染既深非旦夕所能丕變也查例載新疆地方兵丁跟役如有白晝搶奪殺人及爲強盜等事該辦事大臣審實一面奏 聞一面就地正法等語是新疆命盜案件承平之時亦與內地立法不同又查關內各直省近年游勇強劫殺人等案皆係就地正法尙未規復舊制况關外諸凡草創新設

州縣監獄未備若以亡命死囚久拘縲紲設有疏失逃入鄰境爲患滋深揆諸現在情形礙難遽照內地舊制合無仰懇 聖明垂察准將凌遲斬絞立決及秋審列入實例各犯仍照變通章程辦理按季摘山奏報咨部立案俟數年後再行體察情形奏請辦理此外斬絞監候入緩人犯照例應歸秋審惟新疆所屬州縣距省遠者五六千里長途解犯匪特易滋疏失且恐屍親人證拖累難堪若僅憑州縣爰書又慮近於簡率再四思維惟有責成該管州道府遞加看如案情未確擬罪未協均就近提審統咨兼按察使銜鎮迪道覆核轉詳再由 臣按例定擬庶於變通之中仍寓慎重之意刻下案犯既未便照例解勘則秋審自難舉行應請照內地舊事秋審之例屆時造具清冊咨送刑部核議內有改流及仍應監候者均候部覆祇遵至此項斬絞監候秋審入緩各犯原擬監禁五年四年折責省釋誠如部議未免過輕擬將此項人犯及遣軍流徒各犯嗣後均按例定擬隨時分別奏咨聽候部覆辦理其遣軍流徒等犯亦遵照部議南北互相調發仍按罪名之重輕定地方之遠近以昭平允而示區別允之○戊寅諭軍機大臣等有人奏江西南昌縣知縣汪以誠甘酒嗜音向來不理公事因巡撫德馨性愛聽戲遂極力逢迎由上海招一戲班來江請飭查辦等語所奏是否屬實著會同該省確切查明據實具奏毋稍徇隱原摺著摘鈔給與閱看○諭衛榮光奏清釐荒熟田地擬辦情形一摺所稱江蘇各屬州縣新墾田畝現已逐漸加增而膏

吏之舞弊紳衿之影射究屬難免自係實在情形該撫現擬於實荒者認真盤剔隱匿者勒令報完卽督飭司道實心經理總期著有成效勿得徒託空言該省徵收錢糧積弊已久所有從前官吏之侵蝕紳戶之包抗姑免深究嗣後如再查有情弊卽著隨時照例嚴懲毋稍寬貸餘著照所議辦理該部知道○辛巳諭軍機大臣等御史殷李堯奏科場積弊宜除一摺所稱江蘇安徽兩省鄉試並考分卷過多士子或遭屈抑請飭妥籌善策一節是否可行著悉心會議具奏原摺著分別鈔給閱看將此各諭令知之○壬午工部奏臣部欽奉 上諭張曜奏查勘山東黃河情形及黃河舊道酌擬辦法開單呈覽各摺片著工部妥議具奏單併發欽此並將摺片鈔出到部查原奏內稱自商河歷城以下以至利津河面既窄河身又高現在南岸何王莊以下至蒲台民埝以及埝內葦堤格堤一切防禦之法均宜隨地設施以盡堵築之力鐵門關以下北岸已有長堤二十五里應將南岸一律增築接至蕭神廟止至蕭神廟以下多係淤灘擬在近溜河灘審度水勢挑挖川字引河藉水力衝刷以期逐漸深通並用機器船隻隨時淘濬徒駭北岸臨邑商河惠民築有堤埝惟濱州所管之四十四里因村莊過少未及修築惟有將徒駭北岸已築堤者加高培厚未築堤者接續添築並擬在濟河以下李家岸趙莊之間築壩挑河計地不過十里卽可通入徒駭之路接挖河身以達徒駭計長八十餘里徒駭自臨邑縣田家口起至沾化縣流鍾鎮止計長

二百三十里一律挑挖寬二十四丈深一丈五尺即以挑挖之土培築兩岸堤岸建造帶牖石壩一連十二孔近壩兩面各築石堤一段與壩相接每孔寬一丈八尺啟閉有時多寡有數有洩漲之功無壅溜之患經費一項前南河造報單孔石牖每座佔銀二萬兩今以十二孔計之爲數雖須加增山東係產石之區購辦較易當可減省將來再由承辦之員詳細估計至於疏濬河身培築堤壩東省工程向有定章所需經費應由撫臣核計又查河南蘭儀乾河口起至江蘇清河縣北岸楊莊止計長九百八十二里又自楊莊下至安東縣雲梯關止計長二百二十六里又自雲梯關至阜寧縣小沙子海口止計長一百六十里乾河口從前高出水面計有二丈近歲以來伏秋漲時僅有六尺再歷數年誠恐黃流自孽故道衝入南河河身未落堤岸未修四出奔流猝不及防爲患何堪設想竊以全河挽歸故道勢實難行減水分入南河事尚可辦自蘭儀以至清河縣屬之楊莊此九百八十二里內沙淤墊高計一百八十二段統長二百三十里零必須分別挑挖期與上下相通其餘七百五十餘里從前正洪緊溜至今尚有河槽略修舊日引河補築新堤決口約計工料所費無多楊莊以下至海口河身中間現有小河無須挑挖總計南河上下游形勢若分黃流十分之三足以容納惟蘭儀乾河口必須積築大堤緊接兩岸中間建造帶牖石壩分水多寡庶有限制三年之間如有積淤霜降以後酌量挑修以上挑築工程應由沿河該管河務道

員各按地段核實估計資成祇辦呼應既難集事曠易至兩岸大堤既因築塞挖斷自應仍由民間修補無須另給工食似此辦法工省費輕有益無害等語等查山東黃河連年以來民埝長堤屢堵屢潰因海口不暢河身淤墊水不能容之故前侍郎游百川山東撫卽陳士杰有疏濬三策之奏當經卽部於分減一條議令測量地勢妥爲籌辦嗣因直隸總督李鴻章等曾奏停開馬頰而徒駭分減一節駭駭作爲罷論復經卽部於議覆次第籌辦情形摺內請飭卽山東巡撫從長籌議勿拘一說總以有益民生爲主今據廣西巡撫張曜奏稱減水必居上游擬在李家岸趙莊之間建造帶牆石壩接挖河身以達徒駭至流鍾鎮止一律挑寬並於徒駭北岸已築堤者加高培厚未築堤者接續添築誠如聖諭急宜先行詳籌妥辦應請飭下該撫與山東撫卽督飭承辦之員核實估計奏請撥款趕緊興修又據奏稱鐵門關以下長堤一律增築并擬挑挖川字引河兼用機器船隻隨時淘濬等語亦應次第舉辦至該撫以黃水分入徒駭尙在全河下游仍恐未能減黃流之悍是以又有分入河南之請查自咸豐五年河決銅瓦廂以後黃水匯入大清河者三十餘年南河河身半爲居民壅種舊堤亦多殘缺同治年間文彬丁寶楨等曾有挽復淮徐故道之奏嗣據前大學士曾國藩等會奏構工費艱鉅黃河故道遠難規復在案茲據該撫奏稱全河挽歸故道本有三難勢實難行減水分入南河事尙可辦擬於蘭儀乾河口橫築大堤

建造石壩並擇段挑挖河身分黃流十分之三足以容納等語該撫目覩山東河患情形亟籌分減黃流以殺水勢既經周歷河干相度詳審自非懸揣空談可比惟河務重大事關創始不厭求詳可否飭下該撫與管河各督撫再行熟商並切實估算錢糧妥議具奏候 旨遵行之處伏候 聖裁 上諭前因張曜奏查勘山東黃河情形及黃河舊道酌議辦法各摺片當令工部妥議具奏茲據該部奏稱詳核張曜所奏請旨分別辦理等語山東黃河近年以來堤埝屢築屢潰皆由海口不暢河身淤墊以致水無所歸張曜現擬在李家岸趙莊之間建造帶牆石壩接挖河身以達徒駭至流鍾鎮止一律挑寬並於徒駭北岸已築堤者加高培厚未築堤者接續添築係為因時制宜疏銷水勢起見即著該撫會同陳士杰遴委委員核實估計奏請撥款趕緊興修至所擬增築鐵門關以下長堤挑挖川字引河並兼用機器船隻隨時淘濬並著次第舉辦張曜係特派大員籌辦河務是其專責務當不避嫌怨實心經理期工歸實濟款不虛糜毋得稍涉推諉是為至要其所稱可減黃流三分入海之處該撫周歷河干詳加相度自係實在情形惟黃河北徙計已三十餘年現欲減水分入故道其中有無窒礙必應再三詳審俾得有利無害以重河務而衛民生所有減水分入故道一節即著張曜會同曾國荃嚴駿成孚衛榮光陳士杰邊寶泉悉心妥議具奏○癸未張之洞等奏臣等於光緒十一年七月二十八八月初二等日先後承准軍機大

臣字寄光緒十一年七月初五日奉 上諭鎮南馬白二關爲滇桂入越邊要處所等因欽此仰見 聖主鞏固邊防精核武備之至意 臣等無任欽服當卽公同詳加籌議伏查廣西南邊綿亙二千餘里原設隘所一百零九處分卡六十六處與越南之諒山高平宣光等省接壤山勢紛歧路路可通而鎮南關至龍州一路較爲寬平故竊爲中越使命商賈往來之通衢東出太平南甯西出歸順鎮安之總匯且自龍州以東河灘漸廣舟行下水直達潯梧其視全桂腹地東省上游據有建瓴之勢實爲兩粵利害所關當此欵議既成外防游匪內靖伏戎鎮南一關尤爲中外鈐轄 聖諭所謂扼要隘重兵者無以易此惟南關固居極衝而關之中後關之左右各路均須擇要設防而後氣力不形單薄不致有腹背受敵肘腋乘虛之虞大要分爲三路鎮南關口及關以內之關前隘丹近內之憑祥土州爲中路曰關以東明江關轄之由隘甯明州轄之羅隘思陵土州轄之愛店隘上思州轄之百奇隘剝機隘爲東路曰關以西龍州轄之平而水口兩關下凍土州轄之布局隘梗花隘歸順州轄之頻峒隘龍邦隘小鎮安關轄之平猛峒隘剝淦隘百懷大隘等爲西路以上各隘皆須屯兵中路最急東路隘口較少西路地段較長原有防軍三十二營聲勢僅能聯絡現在餉需絀絀須籌經久之計而越境游勇蔓延全邊未靖又值勘界未定之時未便示人以弱勢難多議裁減茲於本年三月起認真汰留裁去八營併爲二十四營以十二營專

防鎮南關中路以四營分防東路六營分防西路路寬者築臺安礮路窄者設卡安濠其僻者掘斷禁阻
戍所擇造地營營外多栽刺竹無事則各分守地督飭操練有事則酌量緩急抽調赴援俟冬間界務大
定再當裁去四營中路酌減兩營西路酌減兩營以節餉需以後全桂大勢注重邊防必宜有大將親臨
控制調度擬請廣西提督由柳州移駐龍州原有提標制兵五營擬撥中軍參將一營隨來龍州以資策
遣而符體制將原屬新太協之龍應營都司改爲龍州城守營游擊隸於提標照例設該游擊中軍守備
新太協駐紮太平府距龍州最近應併將新太協副將率其所轄左營都司趙森營都司共兩營改爲專
屬提督毋庸轄於左江鎮其新太協右營守備一營應卽裁汰柳州東屏桂省北控黔湘苗疆緊要擬請
添設柳慶鎮總兵一員鎮守柳州慶遠義甯融懷等處地方駐紮柳州府以提標存留左右兩營游擊改
爲鎮標左右兩營左營卽爲該鎮中軍提標左右兩營應俟邊軍規模詳定後卽行裁汰所汰之兵發給
一年餉銀兵米俾資改業官弁遇缺另補並撤柳州城守營都司一營附近之慶遠協副將義甯協副將
融懷營參將率其所屬各營俱統轄於柳慶鎮其沿途常駐二十營提督爲總統其下酌設分統現在提
臣蘇元春係奉 旨督辦邊防之員熟悉邊情深孚眾望一切自應統籌調度以後若提臣不兼督辦者
亦宜於防勇內指定十營屬於提督本標以厚兵力龍州開闢通商重兵所萃宜有文職大員同任邊事

擬請設太平歸順道一員總轄全邊駐紮龍州廳以左江道所屬太平府全境暨東邊南甯府屬之上思
州西邊鎮安府屬之小鎮安通判歸順州隸之沿邊統屬一道以明聯絡一氣上思州卽撥歸太平府屬
小鎮安歸順距太平較遠應升歸順州爲直隸州小鎮安改爲鎮邊縣州通判銜屬於歸順州該道兼轄
太平一府歸順一直隸州所有漢土廳州縣土司管理整飭邊防監督關稅以及經理一切中外交涉事
宜設道庫大使一員總管關稅厘務應用緝私委員由該道選擇調委惟查左江道駐南甯轄泗鎮南太
四府鹽法道駐省轄桂平梧鬱四府州今左江道既撥出太平一府而鬱林州遠在全省東南一隅距南
甯止五百餘里距省將及千里督察難及諸多不便該州屬之博白陸川等處毗連廣東高廉系爲匪徒
出沒之區擬撥鬱林直隸州改屬左江道以協形勢而資治理其需餉之數沿邊水土惡劣瘴癘瘴瘴自
物昂貴與腹地情形迥異與向年防剿土匪尤相懸殊若照內地桂勇餉章萬難得力應照從前奏案正
勇月餉三兩二錢以及營哨各費俱照現章合計邊軍二十營加以軍火軍裝轉輾製造修臺築壘電局
雜支各費以及遣送游勇撫恤邊氓所費不貲而軍火尤爲鉅款每月至少亦需銀六萬兩現就本省儘
力搜羅再能此後盤金不致短收地方安謐每年可得三十萬兩計每月仍短銀三萬五千兩無可再少
目前二十四營所需尙不止此數非有外省接濟無從支持查現准戶部咨以後滇黔除四川原解練餉

抵捐兩項共銀二十八萬五千兩照常抵解外再由湖南月協銀二萬兩貴州月協銀二萬兩四川月協銀三萬兩是滇省一年外協的餉已有八十八萬五千兩之多廣西所請協餉僅四十二萬尚不及雲南之半實係刻苦節省免致部撥為難惟有仰懇 天恩飭部指撥近省有著之款可否仿照從前西征協餉近日東北協餉經費考成按月源源撥解以濟急需而免遲誤所慮者新約原有法稅較輕之議關稅開收以後三聯票暢行沿江釐金必然大減彼時稅釐能否相敵尙不可知擬請 飭部於此項關稅留充協餉除該關費用外免撥他用若稅多於釐則請減協餉稅釐並絀則續請加撥應俟屆時據實奏明請 旨辦理至通省綠營馬步戰守兵丁原額一萬二千七百一十五名同治四年五年兩次裁減一萬零九百八十二名迨十二年與光緒元年三年三次復補新增六百五十二名較之原額裁將及半所有實不為多茲擬將提標裁汰前後兩營新太協裁汰左營一營具內地勇丁疊次裁減尙有水陸二十餘營散布防遏常患不敷近日懷集貴縣博白等縣疊次聚匪滋擾之事未敢過涉空虛現復將腹地防勇騰挪裁撤兩營各營長夫一律裁減以冀稍資節省此外兵勇一時實難再裁具沿邊之新太協鎮安協上思營都司各營將徐加體察或就龍州現存勇營內改勇補兵或裁兵留勇藉此日分防之舉即為將來併省之階此外無論兵勇如有可裁之處自當行之以漸力圖撙節以期減一冗食之軍卽省一艱難

之餉至改勝軍以補新額誠爲經久至計但綠營規制細密其間分汛地段挑拔章程俸薪等差推補缺額一成不易必須周詳以通方無窒礙目前猝難定議且綠營積習驟難更改久在 聖明洞鑒之中而兵餉自有通行例章邊關喫緊處所若照綠營辦法則恐難資飽騰若改稱練軍比照直隸練軍章程餉數並不能減其勇名異實同而轉成常設之標營永久之經費竊擬俟兩三年後體察敵軍距邊遠近各臨緩急餉源盈歉內地伏莽能否漸清邊腹迫籌或尙能再加併省倘作爲額兵規制既難猝定定即不便屢改似只可就目前事務力量斟酌維持如有因事變通隨時議奏較爲活便據廣西藩臬兩司會同善後局司道核議會詳前來 臣等謹次往復函電熟商並將圖說郵寄參考意見相同謹遵 旨先行續晰覆陳並將沿邊要隘分布重兵駐防處所繪圖貼說恭呈 御覽其添設鎮道等官建置經費事及改撥標兵營汛詳細章程暨其餘未盡事宜仍俟陸續陳奏是否有當伏候 聖明裁奪 飭部議覆施行得 旨該衙門議奏片併發圖留覽○諭軍機大臣等藩司有用人理財之責必須明白政體旬稽精密方能勝任現調江蘇布政使易佩紳性情才具究竟如何著曾國荃衛榮光於該員到任後悉心察看據實覆奏○已丑召倪文蔚入覲以張之洞兼署廣東巡撫○諭前據內閣學士周德潤御史唐椿森各奏廣西梧州關稅弊竇太多亟應查禁各節當經諭令張之洞等確查具奏茲據查明覆奏所擬免抽梧

關經裁禁洋收規費嚴禁書吏整頓藩務各項辦法均著照所請行丁憂梧州府知府梁俊未能禁止
書巡多取規銀迭經飭查復不據實稟明查禁等無可辭梁俊著照所請以同知降補該員選授梧州府
缺於召見時諭以認真辦事當據面奏曾任官糾人過失斷不自蹈愆尤予人指摘乃履任後竟於關
稅弊竇毫無整頓被參得實殊與前言自相矛盾用特明旨宣示以爲妄自矜詡言行相背者戒○劉錦
棠奏上據藩司魏光燾詳稱迪化州城前經定爲新疆省治該處原建滿漢兩城祇西北隅向有垣牆迤
邐相接其東南一帶勢若箕張不相聯屬且城身低薄於省城要地亦不相宜現飭卽委各員會同履勘
擬將漢城東北之便門及滿城之南右門一律剷平卽於滿城之東南隅起接至漢城南門止展築城基
使兩城合而爲一並於舊城之西增高培厚使與新築城身一律完固估應用銀六萬三千二百餘兩又
創建撫臣衙署估銀二萬九千餘兩藩司衙署估銀二萬五千餘兩以上各工俱擬照向章派營勇輪流
應役詳請核辦前來臣查南路城垣及衙署等工前經臣奏請撥款擇要興修奉 旨允准欽遵在案迪
化係新疆北路舊有兩城形勢悉皆狹隘今既定爲省治自應量加修葺擴而充之庶郡邑民居參相得
也至撫藩衙署體制攸關非度地興工亦不足以示等威而定民志除飭撥節動用不准稍有浮濫以重
餉需仍俟各項工竣核實具報以憑咨部核銷外所有估修新疆省城城垣及撫藩衙署等工理合先行

陳明請 旨飭部立案得 旨該部知道片併發○庚寅予湖南湘鄉縣節婦陳戴氏旌表

五月癸巳朔廣東巡撫倪文蔚因病乞休允之調譚鈞培爲廣東巡撫○召陳士杰來京以張曜爲山東巡撫命李秉衡仍護理廣西巡撫○頒給奉天開原縣城及威遠堡邊門外 龍神廟匾額○醇親王奕譞奏竊臣等於四月十三日夜抵天津會同大學士直隸督臣李鴻章十四日赴大沽十五日展輪出海至奉天之旅順口十八日駛抵山東之威海衛十九日抵烟台二十日回大沽二十二日回津連日將查閱各處礮臺水陸操練機器局武備水師學堂情形電奏並欽奉十六十七日 懿旨遵行在案按旅順扼直奉渤海門戶口門最狹內有東西二澳現用機器溶深可泊師船多隻船塢甫經開挖工程甚鉅非剋期能竣口外衆山環繞天然形勝現於沿海東岸黃金山牧猪磯嶗嶗嘴西岸老虎尾蠻子營饒頭山等處分築礮臺均得地勢仿照西法工程堅固所設克鹿卜後膛大礮多尊皆能攻堅及遠布置洵屬合宜各軍操演鎗礮有準魚雷水雷施放得法堪當大敵惟宋慶所部僅步隊五營扼紮後路尙嫌力薄有事時必須添調閩金州之大連灣水面寬闊能泊多船但口門太廣無可設防是以未經往勘至威海衛亦海濱奧區適當烟臺來路水師屯操皆宜惟南北兩口寬各數里築臺布雷雷宜頗鉅仍須量力次第經營此察度北洋必爭形勢之大概也北洋現祇定遠鎮遠濟遠三鐵艦超勇揚威兩快船可備海戰之

用南洋僅開濟南琛南瑞三船行駛尙速礮位尙大等將前項八船調集旅順洋面合操并令隨行威海烟臺一帶布陣整齊旗語燈號如響斯應各將弁講求操習持久不懈可期漸成勁旅惟此數船尙嫌單分則更少俟明年英德新訂快船四隻北來合之北洋現有五船自成一隊仍俟籌款有著再行續商添購海防關係重大久遠之計將來船隻成軍自應請專設提督等額缺安定章程以專責成而固軍志至鎮中鎮邊鎮南鎮北鎮東鎮西蚊船六隻礮巨船小行駛甚緩只可護礮臺以守海口魚雷艇雖小而速雷行水中無堅不破實爲近時利器而宜多購多操以一鐵艦之價可購四五十雷艇如南北各口有魚雷艇百隻敵船必畏而卻步北洋現只百尺艇五隻道員劉含芳督操甚熟已覺氣勢無前此察度水師應併規模之大概也自來設防之法水陸必相依護即使水軍已成陸營未可盡撤況目下財力極絀師船甚單尤賴礮臺陸軍以自固北洋爲京師拱衛李鴻章所部各隊分布各隘力量並不見厚臣徧加校閱將領多經戰陣礮礮皆係新式操法一律變化整齊尙爲可恃惟練兵先須選將今未雨綢繆尤以教練人才爲第一義練陸軍之人才則以武備學堂爲根本練水師之人才則以駕駛管輪學堂爲根本臣親往兩學堂查勘課程各生徒於陸路礮礮臺之法水軍測量推算之理童而習之長令入營管帶隊伍必得實用將材自日出而不窮亟須逐漸擴充爲費無多而裨益甚大此察度陸軍不宜遽裁學

堂仍須推廣之大概也除將水陸各操魚雷圖樣及旅順大沽礮臺參用華洋各法繪圖恭呈 御覽外所有巡閱北洋查勘情形謹會同都統 譚善慶繕摺具陳又奏 此次校閱北洋水陸各營操練各將領文武等均能勤奮將事官弁兵勇步伐整齊一律嚴整鎗礮雷電施放靈捷自應量與獎賞以示鼓勵除將各軍統帶管帶官及哨弁人等分別獎給翎枝衣料物件兵勇按名賞給銀兩外所有尤爲得力之四川提督宋慶著湖南提督周盛波廣東陸路提督署通永鎮總兵唐仁廉記名提督天津鎮總兵丁汝昌安徽皖南鎮總兵史宏祖記名提督大沽協副將羅榮光候補副將鄭崇義記名總兵黃春源二品銜津海關道周馥二品銜直隸候補道劉含芳袁保齡等均請 旨交部從優議敘其經理機器輪船各局出力之直隸候補道潘駿德盛宣懷分省補用知府龔照璵均請 旨交部議敘俾昭激勵至統帶南洋三船之革職留營花翎提督銜記名總兵吳安康上年在浙江鎮海堵擊法船奮勇可嘉現帶船北來合操紀律號令均尚整肅未便沒其勞勩應如何 加恩之處出自 聖裁欽奉 慈禧端佑康頤昭豫莊誠皇太后懿旨醇親王奕譞奏巡閱北洋詳陳水陸操演情形及請獎敘將領員弁及分給寶星各摺片覽奏均悉精練水師前經著令先從北洋開辦此次醇親王奕譞親赴天津會同李鴻章督慶周歷旅順等處將南北洋輪船調集合操並將水陸各營一律校閱技藝均尚純熟陣法亦極整齊除各軍統帶管帶

各員及哨弁兵勇由該王獎給物件銀兩外四川提督宋慶著湖南提督周盛波廣東陸路提督聶永
鎮總兵唐仁廉天津鎮總兵丁汝昌皖南鎮總兵史宏祖大沽協副將羅榮光候補副將鄭崇義記名總
兵黃春源津海關道周馥直隸候補道劉含芳袁保齡均著交部從優議敘候補道潘駿德盛宣懷分省
補用知府龔照瑛均著交部議敘已革總兵吳安康留營効力統帶南洋輪船尙稱得力著加恩賞給四
品頂戴至洋員教練兵艦著有成效亦應一律獎勵除分別給予寶星外楠威里教演水師尤爲出力著
再加恩賞給提督銜漢納根監造礮臺堅固如式著再加恩賞給三品頂戴以示鼓勵海防關係緊要必
須逐漸擴充歷久不懈據奏練兵先須選將陸軍人才以武備學堂爲根本水師人才以駕駛管輪學堂
爲根本洵屬扼要之論並據王而各學堂肄業於請求戰備外兼習經史尤屬合宜又據奏已革道員
楊宗瀛前辦天津武備學堂規制頗能整肅可否彙錄用等語楊宗瀛著准其留於直隸交李鴻章差
遣委用此次巡閱之後醇親王務當會同李鴻章等物色將才實力整理並督飭現在管帶各員認真練
習力求精進應如何籌集巨款續添船礮之處著隨時會商奏明辦理○欽奉 慈禧端佑康頤昭豫莊
誠皇太后懿旨天津大沽口海神廟素著靈應迭奉 列聖頒發御書匾額此次醇親王等巡閱各海口
涉歷波濤仰邀神佑迅速平穩現值廟宇重新工程告竣著頒給御書匾額二方交李鴻章祇領分別敬

繡懸挂以簪神庥○諭殺虎口監督明保奏差滿回京將交盈餘銀兩一摺所得盈餘等項銀三千六百八兩零均交廣儲司明保著毋庸賞給該衙門知道○甲午調松椿爲直隸布政使以陳鏞爲湖南布政使○以徐卬署吏部左侍郎○以奎斌爲湖北巡撫○乙未諭御史文海奏請嚴禁士子吸食鴉片一摺士爲四民之首宜如何束身自愛若如所奏本年會試士子竟有手提鴉片烟燈出問情事實屬不成事體該御史當時既經目覩何得因人數衆多不卽扣留懲辦嗣後鄉間各場所派出的大臣等務當實力稽查如有前項弊端卽行送交刑部以例辦理並著各省督撫於鄉試時一體認真查辦以端士習而挽頹風○以方汝翼爲甘肅按察使○丁酉李鴻章電致總理各國事務衙門吳欽差初三來電二十六議定土字界牌照舊圖挪前十八里離海口二十二里再前則沙土浮鬆不能立牌現與巴使定期歸還黑頂子補寫記文將圖們江一段重繪切圖畫定紅綫俟奉電 旨卽與巴使畫押蓋印乞轉電總署代奏回電由余道速遞激云云請轉奏 上諭軍機大臣等李鴻章轉電吳大澂所議展界暨牌補記繪圖各節均尙妥協卽著照議畫押○頒給湖北通城縣 城隍廟及城南錫山 龍神廟匾額○以劉得爲湖南岳州鎮總兵○戊戌李鴻章奏臣於上年九月面奉 皇太后懿旨飭派英人敦約翰前赴羅馬商請教皇令教士將內城蠶池口教堂遷移疊將商辦情形函達醇親王暨總理衙門轉奏在案本年三月

二十九日據津海關稅務司德璫琳送交敦約翰羅馬來電云教皇允移讓北堂並令駐京教士樊國樑速赴羅馬面詢移堂事宜務請將改移地方趕緊議定並如何改建之法訂妥等語當卽據情電奏旋准總理衙門四月初一日電覆北堂移讓彼既允不建樓必須切實說定案一確據方准在西什庫地方建立教堂惟洋房與內地房屋迥不相同官爲修理有無窒礙務當再行詳度至西什庫在 皇城西北本年方向不利卽使說定移建今年不能動土亦應豫爲議明遵 旨電達等因 卽遵卽密屬德璫琳函招該教士樊國樑來津妥議一切據稱北堂最高處曰鐘樓計八丈四尺茲既蒙 恩准改建西什庫雖距北海尙遠然亦不敢過高擬造大堂自地至樑以五丈爲度鐘樓斷不令高出屋脊是較北堂舊建之樓已減三丈餘緣教堂規矩必有大堂俾資衆士禮拜誦經之所過於卑狹則不能容凡各口洋房均在五丈上下亦非獨異不致有礙觀瞻將來造成時如連鐘樓測量若逾五丈以外情願拆平以昭誠敬至改造一節該教士力求由官照原式代爲修造惟洋房與內地房屋不同且匠既非夙諳查其原堂規模闊大物料繁巨尤慮依樣估修轉滋糜費應仍折給價銀由該教士自行起造 臣初祇允給銀二十萬樊國樑堅稱不敷尙多續又遞允至三十萬彼仍求加給五萬據該教士呈出北堂房屋地基原圖並譯丈尺物件清單 臣約略核計所費實屬不貲適醇親王蒞津面與籌商以教士既願遷讓情詞恭順國家亦不

必過爲計較俾示大方可照三十五萬兩定議德璫琳樸中國海關所用人員應飭與德教士訂立合同
畫押爲據四月二十六日臣傳集德璫琳樸國樸來署將所議合同五條面加釐訂查西什庫地方未知
方廣丈尺若干該教士欲全行付給臣與再四駁議改爲將西什庫南邊地方酌給三分之二應請飭
下步軍統領地面官員早爲量度傳諭所有樹木磚石勿任損壞如有民居小屋在四至以內礙事者似
應給資搬移俟屆冬月交與教士收管庶免藉口又北堂所有百鳥堂內異方禽獸及一切古董物件鐘
樓內風琴喇叭等據德教士稱歷年多方覓購實費巨款齊不欲與臣商令全數報効不准遷移短少該
教士勉爲遵允因添載末條以免異日翻悔當即照繕中法文令德璫琳樸國樸各自畫押存案謹照譯
合同恭呈 御覽樊國樸卽於二十七日起程赴羅馬該教士人尙公正素爲教會領袖據稱教皇必可
批准法國亦無異詞彼至羅馬奏准卽速電知屆時臣接電後再懇俯准該教士合同所請明降 諭旨
褒嘉以示觀感所有彼此屆期交付事宜應請由醇親王會商總理衙門王大臣派員妥爲經理其應分
期付給銀兩由臣隨時會商海軍衙門總理衙門籌款付給以期仰慰 聖慮至北堂鐘樓太高俯瞰
禁苑中外臣民久滋疑議歷經總理衙門屢商法國使臣飭令拆改頑抗不遵此次醇親王暨臣等設法
商辦竟能模縱如意實屬始願所不及俟事成之日德璫琳敦約翰等忠誠効命及神機營出力人員應

懇 恩施准予優獎合併附陳 上諭軍機大臣等覽奏現擬辦法尙屬周妥均著照所請行該衙門知道單併發 附合同五端其文曰天津稅務司德瑞琳北堂教士樊國樑爲商議移讓北堂在西什庫改建酌擬辦法恭呈鈞鑒仍應祇候 大清國 大皇帝大羅馬大教皇御覽批准謹遵奉行事計共五端詳列於後 一自光緒十三年正月初一日起以二年爲限凡北堂仁慈堂地基房屋及樹木等均於限內交付除傢具外一概不准移動損壞 二應請於本年十一月初一日將西什庫內南邊地方酌給三分之二丈畝四至交與北堂主教收管該地現有樹木若干一併交付不可拆損移動 三查北堂地方係康熙年間蒙 聖祖仁皇帝賞給教士等居住並派員相助起建天主堂又頒發 敕建天主堂金字匾額中外同深欽感今因 朝廷欲廣禁地教士等遵 敕移讓復蒙 賞西什庫內地方另爲建堂 朝廷厚澤深仁後先一轍教士等尤深感激應請奏明按照康熙年間辦法明降 諭旨俾中外咸知教士等永遠遵守則仰荷 恩寵益無涯涘 四如蒙查照康熙年間成法辦理頒發 諭旨教士等於西什庫新堂成後當照南堂式恭刊 詔旨於碑護以黃亭以漢白玉製匾以昭誠敬至在西什庫建造大堂自地至樑以五丈高爲度鐘樓亦斷不令高出屋脊 五此次在西什庫改建北堂教士等甚願官家按照北堂仁慈堂原樣代爲改造房屋一切均照原式是爲最要如官家不肯照樣代辦祇得由教士

等世嗣自行起造此項工料銀兩應請於付西什庫地方時付給三分之一過六箇月再有一次又六箇月付訖分作三次爲時十八箇月似較輕便按此次另建北堂仁慈堂工料等項實需用至四十五萬餘金奉中堂諭令核減教士等於無可減之中勉力酌減銀十萬兩計共需庫平寶銀三十五萬兩此係格外報効伏祈北察再北堂所有白鳥堂內禽獸及一切古董物件鐘樓內風琴喇叭等樊教士願請教皇明示概行報効奉送 中國國家○劉錦棠等奏 臣錦棠前將遵 旨馳赴伊犁日期並與臣錫綸商辦各事擬先從勇營著手大概情形於上年十二月初二日附奏陳明在案旋據將軍金順咨送冊開伊犁防勇馬步二十八營旗員弁勇丁一萬五百餘名其中多有上年八月以後新募入伍者此項新勇又多招之市井並非無業可歸者然已入營數月各有應得口糧不能一概不發當經臣等商定於伊犁應分月餉內酌發滿餉一月商飭各統領營官將新勇概行裁去以免多侵存餉再將實存勇丁開具花名清冊聽候點驗續具冊呈多不如法一再駁請另開於本年正月及二月初旬陸續議開具報計開除新勇二千餘名實存七千餘名當飭挑留精壯改爲馬隊九旗步隊十三旗委提督馬玉崑李若祥綏定鎮總兵鄧增等分起統帶其餘裁撤勇丁遣歸原籍內有情願於伊犁落業屯墾准其報名撥地安插此歸併各營之實在情形也各營每月向照七大半發給餉銀外發過食糧及衣服包山均未曾扣價爲日既多

無從查核等復經商議定以入營在一年之內者發存餉銀四兩一年之外每歲酌加二兩按年遞加
續至十年發銀二十二兩其有入營在十年以上者遠無可考未便更加率以十年爲斷哨官每員發銀
六十兩統領官稽其久暫酌發薪工銀兩幫辦及幕友薪水等項由各該統領營官自行清理不另開支
其裁撤回籍之弁勇視留營之所應領數各倍之惟道里遠近不同此次發給存餉祇能按年遞加不能
再分道里俟至烏魯木齊察其歸程較遠所領不敷盤費者尙應酌量增加此項約須銀一萬餘其不能
在此遞加者緣由留營之勇所領無多恐不免因之計較也其情願寄居落業者照回籍弁勇酌改四分
之一日內派員按名核發各營勇始猶申訴轉輒求加當飭統領營官再三開導始各無詞以退以上約
共銀二十一萬五六千兩下存八萬餘兩擬以爲吉江馬隊遣撤回旗盤費各勇營每年領餉既無細數
可稽每人應存若干卽問之勇丁亦不能自悉此次蒙 恩飭撥部款爲之清理舊欠得銀多寡視日淺
深臣等奉 命以行幸得帖然無事隨諭各統領旗官將從前欠餉一概截止以後月餉自本年二月另
行起支此又清理勇營欠餉之實在情形也查伊犁營勇臣錦棠前奏請以四千人爲度經部議核准自
應照辦惟現在境內盜風尤未盡戢居民商旅時有戒心禁暴請奸不容疏忽且裁去新勇二千餘人又
裁老弱二千餘人按原冊一萬五百人之數裁撤已將及半現在軍心甫定亦未便再事減裁當飭各統

領旗官將挑留勇丁俱照楚軍營制訓練操防並照楚軍行糧章程按月關餉不得少有尅扣營旗存數應由臣錫綸遵照部章按季查明開單具報至伊犁東路接至西湖向山金順派所部分屯其地現在伊犁各營既經裁併地遠不敷分布其從伊犁至大河沿山臣錫綸派隊駐紮精河以東接至西湖中間四站由臣錦棠抽調所部馬步大營旗委陝西漢中鎮總兵戴宏勝統帶逐段填防以期周密得旨該部知道○己亥四川總督丁寶楨卒賜祭葬贈太子少保銜入祀賢良祠予諡文誠賞其子體管郎中○以劉秉璋爲四川總督○駐藏幫辦大臣崇綱因病乞休允之○庚子調衛榮光爲浙江巡撫以崧駿爲江蘇巡撫盧士杰爲清運總督李嘉渠爲江西布政使○以尙書爲駐藏幫辦大臣○諭劉銘傳奏各路生番歸化請將開山剿撫尤爲出力官紳懇恩給獎一摺上年冬間臺灣生番滋事經劉銘傳督率官軍分路剿辦並派員赴各社反覆開導該番等懾於兵威率眾就撫現已招撫四百餘社歸化七萬餘人辦理尙爲妥速劉銘傳調度有方深堪嘉尙劉朝祐章高元隨同辦理剿撫事宜頗爲得力該二員均著交部從優議敘其餘出力員弁官紳不無微勞足錄自應量予獎勵道員林朝棟著賞給勳勇巴圖魯名號並加三品銜總兵劉泰和著賞給健勇巴圖魯名號唐仁園著以提督交軍機處記名並遇有總兵缺出先行請旨簡放提督尤福聚著賞給一品封典參將張廣居著免補參將以副將仍留原省儘先補用典史

陸陳謙著以縣丞仍留福建補用武舉黃希文著以守備補用軍功陳森吳著費給五品藍翎另片奏前
藩司沈寶奎贊助撫番籌畫經費異常出力請逾格施恩等語沈寶奎著賞還原銜花翎餘著照所議辦
理該部知道○辛丑諭兵部奏遵議廣東裁併改撥總兵各缺一摺廣東陽江鎮水師總兵著即裁撤改
設北海鎮水陸總兵以資控制其高州鎮總兵並著改為水陸總兵餘依議該部知道○以張富年為江
蘇按察使○壬寅賜趙以炯等三百人進士及第出身有差○乙巳李鴻章等奏查出洋肄業章程向以
三年為限生徒期滿學成則予一律請獎此次北洋函廠所派第三屆出洋學生習駕駛者仍以三年為
限習製造者則酌予變通以六年為限凡以便各生於其所學益求精密期必進窺奧窔而後歸也惟駕
駛製造同一出洋而相較年月增至一倍若使製造學生必俟六年期滿方予獎勵彼此相形恐無以作
其歷久不衰之氣臣等細加體察擬請俟此次出洋駕駛學生三年期滿學成回華之日責成華洋監督
將因展限期留洋學習之製造學生按名出具切實考語備文呈送山王等先予擇尤彙案請獎一次俟
六年期滿回華如果各生所學均能益臻深造再予一律請獎以符向章而昭公允使各生咸知 朝廷
作育人材令其重遠涉期限倍增所以獎勵之者亦復有加無已必能爭先奮發相勵有成庶於變通
肄業事宜不無裨補得 旨允行○陳士杰奏惠民縣姚家口開決後水歸徒駭山與司道會商擬於口

門進上築挑水壩二道挑開溜勢並於堤埝間築橫堤一道以保下游村莊其徒駭河北岸先已派員督修民埝業經奏明在案茲據下游防營統帶馮義德稟稱姚家口進上築成大壩一道寬五丈長一十八丈開引河一道寬十丈長里許至二道挑壩應俟引河放水後察看情形再行辦理又據惠民縣在工各員稟稱該處堤埝之間築成橫埝一道長四百餘丈底寬八丈頂寬一丈高八尺卽已告成酌給津貼銀一千二百兩又據知府胡鳴泰稟稱徒駭河北岸民埝禹城縣地段南北兩岸共長一百五十四里均築成底寬五丈頂寬一丈高八尺齊河縣地段長二十里均修成底寬三丈頂寬一丈高五尺臨邑縣地方長二十二里築成底寬三丈頂寬一丈五尺高一丈二三尺濟陽縣地方長四十五里築成底寬四丈頂寬三丈高一丈二三尺不等商河縣地方長七十五里又幫修濟陽三十餘里築成埝身高寬與濟陽相同以上禹城齊河臨邑濟陽商河五縣均由地方官勸督百姓自行辦理以下則爲惠民所管其地段長八十餘里幫築底寬四丈頂寬一丈高七八尺不等險要之處加築護埝一道該縣民情困苦諭令陽信幫築十二里並於賑款項下撥銀一萬兩作爲以工代賑以資津貼亦已一律築成再下則濱州所轄北岸只十餘村莊河水入海之路無從修築該縣居民均在南岸只好勸諭修築南埝其南埝上段三十餘里地勢較高紳民稟請毋庸修築下段四十餘里修成底寬五丈頂寬二丈高五尺均由民間自行修築

等語臣查此次辦理徒駭河埵經署武定府知府胡鳴泰率同題補冠縣知縣何式競往返督催並各該州縣剴切勸諭百姓剋期告成辦理尙爲迅速惟高堯丈尺未能一律將來卑薄之處應否加增臣卽日交卸應俟新任撫臣張曜查明分別飭令接修所有出力人員亦應由該撫臣事後擇尤保獎至黃水由姚家口入徒駭河至涇州之裴家口分爲兩道一由徒駭河一名寬河一由止河流鐘口於大年莊匯合入海尙屬通暢合併覆陳報聞○丙午黑龍江將軍文緒因病乞休允之以恭鐸署黑龍江將軍文格署金州副都統○丁未盛京刑部侍郎寶森因病乞休允之以調松森爲盛京刑部侍郎文暉爲盛京禮部侍郎○鹿傳霖奏臨潼盜田雹災賑撫情形得旨覽奏被災情形殊堪憫惻著卽飭屬查勘認真撫恤毋任失所○戊申以續昌署刑部右侍郎轉敬信爲禮部左侍郎以英煦爲禮部右侍郎○己酉諭前據御史慶祥奏請將直隸樂亭縣節孝婦嚴劉氏等旌表當諭令禮部議奏茲據該部奏稱該御史係旗籍人員並非嚴劉氏等親族乃以廬墓俱在該縣爲詞輒爲陳請旌表殊與例章不符等語所有節孝婦嚴劉氏等應行旌表之處著直隸總督飭令該地方官查明辦理嗣後各省應行旌表婦女仍照例由該督撫題請或由同鄉官赴部具呈均著禮部照例核辦其滿漢內外臣工概不准率行擅請以符定制○庚戌予浙江錢塘縣節孝婦吳孫氏旌表○壬子大祀地於方澤遣載勛恭代行禮○癸丑諭軍機大

臣等有人奏廣西桂平等縣有奸商把持桂皮行市及誑稱包稅抑勒價值串通關書舞弊情事窮民受累釐稅日減著張之洞等確查禁革以除積弊○甲寅安徽巡撫吳元炳卒予祭葬○以陳彝爲安徽巡撫○乙卯以孫翼謀爲湖南布政使劉瑞祺爲浙江按察使○以文瑞爲山東兗州鎮總兵○戊午諭著中城御史祥裕等奏坊官門丁撞騙得贓捕役枉法行賄請飭嚴訊懲辦一摺據稱捕役齊順呈控該城吏目邱廷聚門丁田升因包攬承差得贓錢三百千訊供狡展等語該門丁胥役得贓行賄實屬有干例禁著刑部嚴行審訊按律究辦○己未雨○辛酉以綿宜爲內閣學士○子故四川總督丁寶楨於山東建祠○是月法蘭西國使臣戈可當回國上海總領事愷自邇署理○英吉利國新簡駐華使臣華爾身抵任